

TRUTH
CENTERED
TRANSFORMATION

MODULE



UINJILISTI

MWONGOZO WA MWALIMU

Mabadiliko Yanayozingatia Ukweli—Moduli: [Uinjilisti](#) toleo la 4.0 Hakimiliki ©2023 Reconciled World, Phoenix, Arizona, United States of America. www.reconciledworld.org

Kazi hii inapatikana chini ya masharti ya leseni ya Creative Commons Attribution–ShareAlike 3.0. Unaruhusiwa na kuhimizwa kuitumia kazi hii, kurekebisha, kunakili, kusambaza na kutangaza kwa masharti yafuatayo:

Nukuu– Ni lazima unukuu kazi hii kwa kusema yafuatayo: Hakimiliki © 2018 Imechapishwa na Reconciled World (www.reconciledworld.org) chini ya masharti ya Creative Commons Attribution–ShareAlike 3.0 license. Kwa taarifa zaidi, angalia www.creativecommons.org.

Kazi hii haiuzwi- Usitumie kazi hii kwa madhumuni ya kibiashara.



Ikiwa ungependa kutafsiri kazi hii, tafadhali wasiliana na info@tctprogram.org.

Nukuu zote za maandiko, isipokuwa zimeonyeshwa vinginevyo, zimetolewa kutoka katika Biblia Takatifu, Toleo la New International Version®, NIV®. Hakimiliki ©1973, 1978, 1984, 2011 na Biblica, Inc.TM. Inatumika kwa idhini ya Zondervan. Haki zote zimehifadhiwa duniani kote. www.zondervan.com. "NIV" na "New International Version" ni chapa za biashara zilizosajiliwa katika United States Patent and Trademark Office na Biblica, Inc.TM.

Kabla Ya Kuanza

Kujiandaa Kufundisha Somo

1. Soma **Mwongozo wa Mwalimu** kwa uangalifu, mara nyingi iwezekanavyo. Weka alama au andika notisi chini ya mstari kujikumbusha hoja za muhimu.
2. Angalia **mawazo makuu** kwa kila somo ili ujue ni nini wanafunzi wanapaswa kujifunza kupitia somo.
3. Soma aya zote za **maandiko matakatifu**.
4. Angalia kuona ni **matirio** gani yanahitajika kwa kila somo na hakikisha unatengeneza nakala ya miongozo ya wanafunzi (handouts) na tengeza picha za kujifunzia zinazotumika kwenye somo.
5. Hakikisha unaelewa kila **kitendo** katika somo (maigizo, michezo, picha za kujifunzia/vionyesha). Unaweza kuifanyia mazoezi na ndugu au marafiki.
6. Pata muda wa **kusali** ili Mungu awaandae wanafunzi, ili wanafunzi wasikie kile Mungu anachotaka wasikie na ili akusaidie kufundisha matirio. Kumbuka ni kwa njia ya Mungu tu kwamba tutawaona watu wakibadilika.

Jinsi ya Kutumia Mwongozo wa Mwalimu

1. **Malengo na Nyenzo kuu:** Kila somo huanza na sehemu hii.
 - a. **Malengo** – Kuna mawazo mengi mazuri katika kila somo, lakini washiriki/wanafunzi wanapaswa kuyaelewa vyema mawazo haya makuu mwishoni mwa kila somo. Ni vizuri kujiuliza kama malengo haya yamefikwa baada ya kuongoza kipindi. Tumia muda wa kurudia mara kwa mara mada za msingi kuwasaidia kukumbuka.
 - b. **Matirio/Nyenzo** – Matirio maalumu yameorodheshwa kwa kila somo ikiwa ni pamoja na picha za kufundishia, vitini (handouts). Mwongozo huu wa Mwalimu utaonyesha wakati wa kuzitumia. **VIONYESHI** vitaandikwa hivi kwenye masomo.
2. **Maelekezo kwa Mwalimu:** Kuna maelekezo maalum katika somo kukusaidia uongoze mafunzo vizuri. Haya hayakusudiwi kutolewa kwa wanafunzi. Soma haya kabla ili ujiandae kuongoza majadiliano na shughuli. Baadhi ya maswali yatakuwa na majibu yaliyoitalikiwa (*italicized*) kukusaidia kama mwezesaji ujue ni mawazo gani ya kuyasisitiza kwa wanafunzi.

Somo la 1: Mwinjilisti ni Nani?

Lengo Kuu

Kila Mkristo ni mwinjilisti. Chochote tunachofanya ambacho husaidia watu kuwa Wakristo ni uinjilistishaji. Ni lazima tuwaalike watu kuwashirikisha uhusiano wetu na Mungu.

Nyenzo

- Mkate au chakula kingine kinachohitaji kutayarishwa
- Igizo (Nakala 3)
- Chupa au kikombe

Utangulizi

KIKUNDI KIKUBWA CHA MAJADILIANO

Maelekezo kwa Mwalimu: Shika **mkate au chakula kingine**. Liambie darasa lifikirie mlo mzuri waliokula. Uliza ni nani aliyesaidia kutayarisha chakula. Baada ya majibu machache, lisaidie darasa kufikiria watu wengi zaidi wanaohusika katika kuandaa chakula.

(Mifano: Mtu fulani alichanganya kinyunga na kuoka, mkulima alilima nafaka, mtu fulani alisaga nafaka. Mtu mwingine alichonga jiwe ili kusaga nafaka, mwingine akachimba chumvi, na mwingine akasafirisha chumvi na nafaka dukani, mwingine akauza chumvi, na mtu mwingine akapata maji. Mtu fulani alikusanya kuni kwa ajili ya moto. Mtu fulani alitengeneza sufuria ya kuokea mkate.)

Inachukua watu wengi kuandaa chakula, sio tu yule anayepika.

- Kwa kawaida tunamfikiria nani kama wainjilisti?
- Fikiria jinsi ulivyokuwa Mkristo. Nani alikusaidia? (*Uliza maswali yafuatayo taratibu ili kumpa kila mtu muda wa kutafakari*)
 - Je, kuna mtu alikuombea?
 - Je, mtu fulani alikusaidia ulipohitaji msaada?
 - Ni nani aliyekushirikisha injili?
 - Je, ulimwona Mkristo akitenda tofauti na wengine?
 - Je, ulikulua katika familia ya Mkristo? Nani alikufundisha kuhusu Yesu ulipokuwa ukua?
- Watu hawa wote walikusaidia kuwa Mkristo. Je! wote walikuwa wachungaji, viongozi wa kanisa, au watu wanaofanya uinjilistishaji kama kazi yao?

Wewe ni Mwinjilisti

KIKUNDI KUBWA CHA MAJADILIANO

Tutasoma vifungu vitatu vya Biblia. Vyote hutoa taarifa juu ya uinjilisti. Kabla ya kusoma, hebu tuone maagizo haya yaliandikwa kwa nani.

- 1) Katika kifungu cha Mathayo, Yesu anatoa maagizo kwa wanafunzi wake.
 - Leo, nani ni wanafunzi wa Yesu? (*kila muumini*)
- 2) Katika kifungu cha Wakolosai, Mtume Paulo anawaandikia ‘watu watakatifu wa Mungu’ katika mji la Kolosai.
 - Leo, nani ni ‘watu wa Mungu’? (*kila muumini, kanisa zima*)

- 3) Katika kifungu cha 1 Petro, Mtume Petro anaandika kwa ‘Wateule wa Mungu [ambao] wametawanyika’.
- Leo, ‘wateule wa Mungu’ ni nani? *(kila muumini, kanisa zima)*
 - Kwa hivyo, ni nani anayepaswa kufuata maagizo haya yote ya uinjilisti? *(kila muumini)*
 - Mwinjilisti ni nani? *(kila muumini)*

Maelekezo kwa Mwalimu: Mwombe mtu asome kila mstari kwa sauti. Baada ya KILA mstari, uliza swali lifuatalo.

- Je, mstari huu unasema nini juu ya namna ya kufanya uinjilisti?

Soma Mathayo 28:18-20

- *Fanyeni wanafunzi [kwa] kuwabatiza na kuwafundisha; fanyeni hivi katika mataifa yote.*

Soma Wakolosai 4:5-6

- *Kuwa na busara katika kushirikiana na watu wa nje.*
- *Jua jinsi ya kujibu.*
- *Tumia kila fursa.*

Soma 1 Petro 3:15

- *Kuwa tayari kutoa jibu wakati wowote, kwa kila mtu anayekuuliza juu ya tumaini ulilonalo.*

- Je, mistari hii inatuambia HASA nini cha kusema au jinsi ya kufanya uinjilisti? *(Hapana)*

Mistari hii haisemi hasa jinsi ya kufanya uinjilisti. Inasema kwamba tunapaswa kufanya wanafunzi. Inasema tunapaswa kushirikisha juu ya Yesu wakati wowote tunawezavyo. Inasema tunahitaji kuwa tayari, Mungu anapotoa nafasi. Chochote tunachofanya au kusema ambacho husaidia watu kuwa Wakristo ni uinjilisti.

- Ikiwa unasimulia hadithi ya Biblia kwa mtoto, huo ni uinjilisti.
- Ukikataa kudanganya sokoni na mtu akagundua, huo ni uinjilisti.
- Ukizungumza na mtu kuhusu jinsi dhambi yetu inavyomiza mahusiano yetu, huo ni uinjilisti.
- Ukimweleza rafiki asiye Mkristo kwamba unamsaidia mkeo kazi za nyumbani kwa sababu Mungu anataka umpende, huo ni uinjilisti.
- Ukiomba na jirani yako, ukimwomba Mungu ambariki na kumpa mahitaji yake, huo ni uinjilisti.
- Fikiria tena watu waliokusaidia kuwa Mkristo. Ni nani kati ya watu hawa walikuwa wainjilisti? *(wote)*

Kila Mkristo ni mwinjilisti. Chochote tunachofanya ambacho husaidia watu kuwa Wakristo ni uinjilisti.

Una Kitu Cha Kushirikisha

KIKUNDI KIKUBWA CHA MAJADILIANO

Mwalimu: Waambie watu watatu wasome **igizo**. Mpe **kikombe au chupa** mtu mwenye afya. *(Unaweza kuchagua watu wa kujitolea mapema na wafanye mazoezi mara moja au mbili kabla ya kusoma kwenye kikundi.)*

Kinywaji Maalum

JIRANI 1: *(Anaomboleza, akionekana mgonjwa sana)* Oh, mwili wangu ni mgonjwa sana. Nimechoka sana siku hizi.

JIRANI 2: *(Anaugua, na kuonekana mgonjwa)* Ndio, mimi pia! Ninajihisi mgonjwa kila wakati. Natamani ningepata tiba, ili niwe na afya njema na nguvu!

JIRANI 1: Mimi pia. Lakini sina wakati wa kuangalia hivi sasa. Nahitaji kurudi kazini... nikiweza.

(anaondoka polepole)

JIRANI 3: *(anatembea kwa nguvu akiwa ameshika chupa au kikombe)* Habari!

JIRANI 2: *(kwa kukata tamaa)* Habari. Si ulikuwa mgonjwa jana? Sasa unaonekana kuwa mwenye afya na nguvu!

JIRANI 3: Nilikuwa, lakini nimepata tiba ya kuwa mgonjwa! Imo kwenye kinywaji hiki maalum. Ukinywa hiki, utajihisi mwenye afya na nguvu. Je, ungependa kupata pia? *(Anampa kinywaji Jirani 2)*

JIRANI 2: Oh, ndiyo, tafadhali! *(anakunywa na kuwa na afya na nguvu)* Asante sana!

JIRANI 3: Hakuna shida! Nimefurahi kuwa unajisikia vizuri. *(anaondoka)*

Siku iliyofuata, Jirani 2 alikutana na Jirani 1 tena

JIRANI 1: *(kujikwaa akirudi ndani, anamwona jirani 2)* Loo, umebadilika! Unaonekana kuwa na afya na nguvu!

JIRANI 2: *(akiwa bado ameshika kinywaji chake)* NDIYO...ni kweli! Ni hisia nzuri kuwa na afya na nguvu.

JIRANI 1: Natumaini nitakuwa na afya na nguvu siku moja.

JIRANI 2: Natumaini hivyo, pia. Labda utapata mtu ambaye anaweza kukusaidia. Naam, ninahitaji kwenda. Sasa kwa kuwa nina nguvu nyingi, ninahitaji kwenda kufanya kazi. Kwaheri! *(Jirani 2 anaondoka, akinywa maji yake maalum kwa nguvu nyingi. Jirani 1 anaondoka akiomboleza, angali mgonjwa.)*

- Mtu mwenye afya njema aliwezaje kumsaidia rafiki yake mgonjwa? *(alimpa kinywaji maalum.)*
- Ni jinsi gani mtu aliye mgonjwa anaweza kuwa na afya na nguvu? *(ikiwa mtu anamshirikisha / anampa kinywaji.)*
- Nani anaweza kutoa kinywaji? *(mtu yeyote aliye na kinywaji)*
- Nani alionesha upendo zaidi, mtu ambaye alitoa kinywaji, au mtu ambaye hakutoa kinywaji? *(mtu aliyetoa)*

Watu wenye afya njema walikuwa na kitu ambacho wangeweza kutoa kwa mgonjwa. Kama hivi, tuna kitu ambacho tunaweza kutoa kwa wasioamini.

Tuna uhusiano na Mungu. Wainjilisti huwasaidia watu kumjua Mungu.

- Fikiria tena juu ya watu wote waliokusaidia kutaka kumfuata Kristo.
 - Je, mtu aliyekuombea kuwa na uhusiano na Mungu?
 - Je, mtu aliyekuambia hadithi ya Biblia ana uhusiano na Mungu?
 - Je, mtu aliyekuelezea jinsi ya kumfuata Yesu ana uhusiano na Mungu?
- Je, unaweza kujiona ukifanya kile watu hawa walifanya? Je, unaifanya hivyo?

Hitimisho

Kila Mkristo ni mwinjilisti. Kila mmoja wetu ana uhusiano na Mungu. Chochote tunachofanya ambacho husaidia watu wengine kumjua Mungu ni uinjilisti. Katika moduli hii tutazungumza zaidi juu ya kinachomaanishwa. Tutazungumzia jinsi ya kuinjilisha vizuri.

Na mwenzako, chukua dakika chache kuomba pamoja kwa ajili ya watu unaowajua ambao si waumini.

Somo la 2: Lengo la Uinjilisti

Lengo Kuu

Lengo la uinjilisti ni kuwaleta watu katika uhusiano na Mungu ili wawe wanafunzi.

Nyenzo

- Vitu vya kurusha - vya kutosha kwa kila mtu kuwa na 1-2 (yaani karatasi zilizokunjwa, soksi zilizokandamizwa...)
- Ringi au kikapu

Utangulizi

SHUGHULI YA KIKUNDI KUBWA

Maelekezo kwa Mwalimu: Mpe kila mtu kitu ambacho wanaweza kurusha. Mwambie kila mtu kurusha kitu chake kuelekea lengo. Watauliza lengo ni nini. Sema 'Ndiyo! Hilo ndilo lengo la shughuli hii! Ni vigumu kufikia lengo wakati hujui unalenga nini!' (Shikilia ringi au kikapu. Waruhusu wajaribu kurusha kulipitia hicho, kwa kujifurahisha na kumaliza shughuli.)

KIKUNDI KIKUBWA CHA MAJADILIANO

Maagizo kwa Mwalimu: Katika mjadala huu, usijali kama majibu ni sahihi au la. Somo lililobakia litaongelea hili. Kabla ya kuzungumza juu ya namna ya kufanya uinjilisti, tunapaswa kujua lengo la uinjilisti ni nini.

- Wainjilisti wajaribu kufanya nini? Mwinjilisti anajua kama amefanikiwa?
- Inua mkono wako ikiwa ulisema sala ya toba ulipokuwa Mkristo.

Sala ya toba ni tangazo la imani yetu kwa Yesu na kile tunachoamini katika mioyo yetu. Katika sala hii:

1. Tunakiri kwamba sisi ni wenye dhambi na tunatubu dhambi zetu.
 2. Tunaomba msamaha na maisha mapya kupitia Yesu Kristo.
 3. Tunajitoa kumpenda Mungu na kumtii siku baada ya siku.
- Je, inatosha kwa mtu kusema TU sala ya toba?
 - Mtu akisema sala ya toba, lakini kamwe haji kanisani au kubadilisha chochote kuhusu maisha yao, je, tunaweza kusema kwamba uinjilisti ulifanikiwa?
 - Mtu akisema sala ya toba, lakini anaendelea kutenda dhambi na hataki kujifunza kuhusu neno la Mungu, je, kweli amekuwa Mkristo?

Hebu tuone kile ambacho Biblia inasema kuhusu lengo la uinjilisti.

Uhusiano na Mungu

KIKUNDI KIKUBWA CHA MAJADILIANO

Soma Yohana 3:16

- Kwa nini Mungu alimtuma Yesu duniani?
 - Kwa sababu aliupenda ulimwengu
 - Ili tusiangamie lakini tuwe na uzima wa milele

Soma Yohana 11:25-26

- Yesu anasema Yeye ni nani?
 - Ufufuo na uzima
 - Hawatakufa kamwe (uzima wa milele)

Soma Yohana 17:2-3

- Kulingana na mstari wa 2, Yesu anatupa nini?
 - Uzima wa milele
- Yesu akitupa uzima wa milele, na Yesu NDIYE ufufuo na uzima, je tunaweza kuwa na uzima wa milele bila kuwa na uhusiano na Yesu?
 - *Hapana*
- Kulingana na mstari wa 3, uzima wa milele ni nini?
 - *kumjua Mungu na Yesu Kristo*

Mungu alimtuma Yesu ili tuishi milele pamoja naye. Lazima uwe na uhusiano na Mungu ili upate uzima wa milele.

Soma Warumi 10:9

- Ni mambo gani mawili tunapaswa kuyafanya ili tuokolewe?
 - *Kiri kwa kinywa chako*
 - *Amini moyoni mwako kwamba Yesu ni Bwana*
- Tukisema tu kwa vinywa vyetu kwamba tunaamini, lakini hatuamini mioyoni mwetu, je, tumeokolewa? (*Hapana*)

Soma Mathayo 7:21-23

- Je, mtu anaweza kusema kwamba Yesu ni Bwana wao, lakini hamjui Mungu? (*ndiyo*)
- Je, mtu anaweza kusema sala ya toba bila kumjua Mungu? (*ndiyo*)
- Je, wangeokolewa? (*Hapana*)

MUHTASARI

Kumjua Yesu ndiyo njia pekee ya kupata uzima wa milele. Sala ya toba si sala ya kimazingaombwe ambayo huwageuza watu kuwa Wakristo. Hupati uzima wa milele kwa kusema 'Yesu, tafadhali nisamehe dhambi zangu na unipe uzima wa milele'. Unaipokea kwa kuwa na uhusiano na Mungu.

KIKUNDI KIDOGO CHA MAJADILIANO

- Unajua kama una uhusiano na mtu? (Mfikirie mwenzi wako, ndugu, wazazi, au rafiki mzuri. Linganisha hili na watu unaowajua *kama* – rais au mtu uliyekutana naye hivi karibuni.)

Soma Yohana 14:21-23

- Je, tunapaswa kufanya nini katika uhusiano wetu na Mungu? (*Kutii amri za Yesu, kumpenda*)
- Mungu na Yesu watafanya nini?
 - *Watakuja kwetu*
 - *Watatupenda*
 - *Watafanya makao yao pamoja nasi*
- Uhusiano wetu na Mungu unafanana na uhusiano na mtu mwingine? Je, una utofauti gani?

RIPOTI NA MUHTASARI

Kuwa na uhusiano na Mungu kunamaanisha kwamba tunamwamini. Tunampenda. Tunamtii. Tunatumia muda kuzungumza Naye. Lengo la uinjilisti ni kuwaleta watu katika uhusiano na Mungu.

Agizo Kuu

KIKUNDI KIKUBWA CHA MAJADILIANO

Muda mfupi kabla ya Yesu kurudi mbinguni, aliwapa wanafunzi wake maagizo ya kufanya uinjilisti.

Soma Mathayo 28:16-20 tena – ‘Agizo Kuu’.

- Yesu aliwatuma wanafunzi wake wafanye nini? (*fanyeni wanafunzi, mkiwabatiza na kuwafundisha*)

Soma Yohana 15:8

- Mtu anaonyeshaje kuwa yeye ni mfuasi wa Yesu? (*kwa kuzaa matunda*)

MUHTASARI

Hebu tuweke mawazo haya mawili pamoja. Lengo la uinjilisti ni kuwaleta watu katika uhusiano na Mungu, ili wawe wanafunzi. Watu wanapozaa matunda, tunajua wao ni wanafunzi. Tunajua wana uhusiano na Mungu.

Matunda ya Mwanafunzi

KIKUNDI KIKUBWA CHA MAJADILIANO

Tuzungumzie matunda haya.

Mjane Aliyonyesha Matunda

Baada ya kifo cha mumewe, Nagamani alitaka kufa. Familia ya mumewe ilimfukuza. Alirudi kijijini kwao akiwa na watoto wawili wadogo. Alijiona hana thamani na hana tumaini. Muumini wa kanisa alimweleza Mchungaji Paulo kuhusu Nagamani. Mchungaji Paulo alimtembelea. Alimuuliza, ‘Napaswa kuishi kwa ajili ya nini?’ Akamwambia ‘Lazima uishi kwa ajili ya Mungu na watoto wako, si kwa ajili yako mwenyewe’. Kanisa lilianza kumtunza Nagamani kama familia. Walilipa elimu ya mtoto wake wa kiume. Walisali pamoja naye alipokuwa na msongo wa mawazo. Walimpa cherehani. Kwa cherehani, Nagamani aliweza kupata pesa kwa kushona sari. Alipata pesa za kutosha kulipia karo ya shule ya bintiye na kutunza nyumba yake. Aliona jinsi kanisa lilivyompenda ingawa hakuwa Mkristo. Kwa sababu hii, Nagamani alitoa maisha yake kwa Yesu. Alitoka kwenye unyogovu wake. Alianza kuhudhuria ibada. Alichangia pesa kwa Matendo ya Upendo. Sasa anawafundisha wasichana kutoka kijijini kushona nguo ili waweze kujikimu. Pia husaidia kuandaa chakula kwa wajane wengine kanisani. Wakati mwingine yeye huwapa sari pia.

- Je, Nagamani alionyesha matunda ya aina gani baada ya kutoa maisha yake kwa Yesu? (Unawezaje kujua kwamba ana uhusiano na Mungu?)
 - Alitoka kwenye unyogovu / msongo wa mawazo (*furaha*)
 - Alihudhuria kanisa
 - Alionyesha upendo kwa wengine (*alitoka pesa, chakula, sari; alifundisha wengine kushona*)

KIKUNDI KIDOGO CHA MAJADILIANO

- Fikiria kuhusu maisha yako kama Mkristo. Shirikisha jinsi maisha yako yalivyo tofauti kwa sababu ulimkubali Kristo. (Kwa mfano, je, una hamu ya kujifunza neno la Mungu? Je, unasikitika unapotenda dhambi?)
- Ni aina gani nyingine za matunda ambazo mwanafunzi anaweza kuwa nazo?

(Kama vikundi vinahitaji mawazo, mwezesheji anaweza kuwahimiza kwa kutumia orodha hii ya mifano ya mitazamo na tabia)

Yuko tayari kujifunza

Mwenye huzuni/kutubu anapotenda dhambi

Ana unyenyekevu na uadilifu

Husamehe alipokosewa

Anajaribu kuponya mahusiano mabaya

Anajaribu kutii Biblia

Husaidia wengine, hasa maskini

Hujenga mahusiano na Wakristo wengine

Anataka kumpendeza Mungu katika kila eneo la maisha

Huweka mahitaji ya wengine kwanza

Anasoma Biblia na kuomba

Anamwamini Mungu katika matatizo

Hutumia rasilimali kuleta utukufu kwa Mungu

Yuko tayari kwaajili ya watu kujua wao ni Wakristo

Huhudhuria kanisani

Anatumia muda na Mungu

MREJESHO NA MUHTASARI

Maagizo ya Mwalimu: Ikiwezekana, andika mawazo ya vikundi ya 'matunda' kwenye ubao.

KIKUNDI KUBWA CHA MAJADILIANO

- Fikiria kuhusu matunda uliyoorodhesha. Je, tunda hili linapaswa kuonyeshwa sasa, au baada ya kifo? (*sasa*)
- Je, matunda haya yanaonyeshwa Jumapili tu, au kila siku? (*kila siku*)
- Je, mtu ni Mkristo ikiwa anasema sala ya toba, lakini hazai matunda yoyote? (*Hapana*)

Wanafunzi wa kweli huzaa matunda. Wanampenda Mungu. Wanajaribu kumtii na kumpendeza Mungu.

Hitimisho

Lengo la uinjilisti ni kuwaleta watu katika uhusiano na Mungu, ili wawe wanafunzi. Sio kumfanya mtu aseme sala ya toba. Kusema maneno fulani haimaanishi kuwa mtu ameokoka na ana uzima wa milele. Tunajua watu ni wanafunzi wanapozaa matunda. Hii ina maana kwamba maisha yao yanabadilika kwa sababu wanamfuata Yesu. Hili linapotokea, tunajua wana uhusiano na Mungu na wana uzima wa milele.

TAFAKARI BINAFSI

- Je, unawajua watu wanaosema kuwa wao ni Wakristo, lakini hawazai matunda? Tumia dakika chache kuwaombea.
- Na wewe je? Je, mtu angekutambua kama mfuasi wa Yesu kwa matunda yako?

Somo la 3: Uinjilisti ni mchakato Kama Kilimo

Lengo Kuu

Uinjilisti ni mchakato kama kilimo. Kwa watu wengi, uamuzi wa kumfuata Kristo haufanyiki baada ya kusikia injili mara moja tu.

Nyenzo

- Mchakato wa kadi za uinjilisti (kadi 6)

Utangulizi

Katika somo lililopita tulijifunza kwamba lengo la uinjilisti ni kuwaleta watu katika uhusiano na Mungu, ili wawe wanafunzi. Sasa hebu tuzungumzie jinsi watu wanavyokuwa wanafunzi.

KIKUNDI KIDOGO CHA MAJADILIANO

Maagizo kwa Mwalimu: Polepole soma maswali haya kwa sauti. Wape muda watu watafakari unaposoma.

- Ni nani aliyekuambia juu ya Yesu kwanza? Ilitokea lini? Je, ulikuja kwa Yesu mara ya kwanza uliposikia habari zake, au ulisikia mara kadhaa?
- Nani aliomba pamoja nawe ili kumpokea Yesu? Ilikuwa je?
- Ikiwa ulilelewa katika familia ya Kikristo, je, unaweza kukumbuka wakati au hali ambazo uliamua kufanya imani yako katika Mungu kuwa jambo la maana zaidi maishani mwako? Nini kilitokea?

TOA MREJESHO

Maagizo kwa Mwalimu: Kutoa mrejesho, waambie watu wanyooshe mikono yao, unapouliza maswali haya.

- Ni wangapi kati yenu mliokulia katika familia za Kikristo?
- Ni wangapi kati yenu waliojifunza juu ya Yesu kwa mara ya kwanza kutoka kwa mtu asiye wa familia yenu?
- Ni wangapi kati yenu walikuwa Wakristo baada ya kusikia habari za Mungu mara moja tu?
- Ni wangapi kati yenu waliwajua baadhi ya Wakristo kwa miaka kadhaa kabla ya kutoa maisha yako kwa Mungu?
- Ni wangapi kati yenu walipaswa kupitia hali ngumu ili kutambua kwamba ulimhitaji Bwana kubadilisha maisha yako?
- Ni wangapi kati yenu ambao bado walikuwa na mengi ya kujifunza kuhusu jinsi ya kuwa Mkristo baada ya kusema sala ya toba?

MUHTASARI

Watu wengi hawawi wanafunzi ya Yesu kupitia uzoefu wa mara moja uitwao 'uinjilisti'. Hili ni kweli hata kwa wale wanaokulia katika familia za Kikristo. Mungu hutumia vitu vingi tofauti kuwaleta watu kwake.

Uinjilisti ni Kama Kilimo

KIKUNDI KIKUBWA CHA MAJADILIANO

Katika moduli hii tutalinganisha uinjilisti na mchakato wa kilimo. Yesu alitumia mifano mingi ya kulima bustani au kulima kuzungumzia mambo ya kiroho. (Zabibu na miiba - Mathayo 7:16-20; mizabibu - Yohana 15: 1-8; magugu na nafaka - Mathayo 13:24-29; kupanda mbegu - Marko 4: 1-9 na kuvuna mashamba - Mathayo 9:37, Luka 10:2.)

Soma Mathayo 9:35-38.


- Nani ni Bwana wa mavuno? (*Mungu*)
- Wafanyakazi ni akina nani? (*ni sisi*)
- Mavuno ni yapi? (*watu wanaomjua Yesu, wanafunzi zaidi*)

Tunaweza kuwafikiria wote wasioamini kama shamba la Mungu, na sisi ni watenda kazi Wake. **Uinjilisti ni kama kilimo. Mavuno ni wanafunzi wanaozaa matunda.** Katika sehemu nyingine ya moduli hii, tutajifunza kuhusu uinjilisti kwa kufikiria kuhusu kilimo.

- Katika kilimo, wafanyakazi wanapaswa kufanya nini ili kupata mavuno mengi? (*tayarisha udongo, panda mbegu, maji, palizi, tunza mimea mipya, vuna*)
- Je, huu ni mchakato wa polepole, au wa haraka? (*polepole*)


SHUGHULI YA KIKUNDI KIKUBWA

Maelekezo kwa Mwalimu: Weka sakafuni *'Kadi za Mchakato wa Uinjilisti'*. Waambie washiriki waziweke kadi kwa mpangilio. Kisha, soma kichwa cha kila hatua (kwa kukolezwa) na maelezo mafupi ya kila hatua.




Kuandaa udongo

Kulainisha mioyo kumwelekea Mungu




Kupanda mbegu

kushirikisha injili



Kusubiri kuchipuka

kusubiri kama Mungu anavyofanya kazi



Chipukizi jipya

kutoa mwaliko wa kumfuata Yesu; wakiambia kumfuata, wao ni chipukizi jipya



Hudumia chipukizi jipya

kuwasaidia waumini wapya kukua



Matunda

wanafunzi wanaonyesha matunda

Uinjilisti si daima mchakato ulio wazi wa hatua kwa hatua. Kwa mfano, watu wanaweza kusikia habari za Yesu, lakini mioyo yao bado ni migumu. Hatua hizi ni njia nzuri tu ya kufikiria jinsi ya kuinjilisha.

KIKUNDI KIKUBWA CHA MAJADILIANO

Tutumie mawazo haya kwenye hadithi ya kweli ya uinjilisti. Unaposikiliza, jaribu kufikiria jinsi sehemu za hadithi zinavyolingana na kila hatua.

Ling

Ling alikulia katika nyumba ya Wabudha. Alipokwenda chuo kikuu, alijitahidi kulipa karo. Familia yake haikuwa tajiri. Mara nyingi alihangaikia sana pesa na iwapo angeweza kumudu kuendelea na masomo yake kiasi kwamba hakuweza kulala usiku. Alijaribu kila njia kupata usingizi mzuri, lakini alishindwa kabisa. Siku moja, alikutana na kikundi cha Wakristo katika bustani. Walikuwa wakicheza mpira wa miguu. Walimwalika ajiunge na mchezo na kutoka nao baadaye kwa kahawa. Hatimaye, walimshirikisha injili Ling na kumpa Biblia. Ling hakutaka kuwa Mkristo. Hata hivyo, usiku mmoja akiwa macho na wasiwasi, aliamua kujaribu kusoma Biblia. Baada ya kusoma Biblia kwa muda kidogo, alihisi amani. Aliweza kulala usiku mzima. Aliendelea kusoma Biblia ili alale kwa amani kila usiku. Marafiki zake wa mpira wa miguu waliondoka jijini, lakini wakamtambulisha Ling kwa Wakristo wengine. Wakristo hawa wakawa marafiki zake pia. Walijibu maswali yake kuhusu Mungu. Baada ya miezi kadhaa na kusoma injili nne, Ling alimkubali Kristo kama Mwokozi wake. Marafiki zake wapya alimwonyesha Ling jinsi ya kuomba, kumwamini, na kumfuata Yesu katika kila eneo la maisha. Ling aliambia familia yake kuhusu Yesu. Familia yake haikufurahia uamuzi wake, lakini ilimruhusu aendeleo kuwa Mkristo—mwanzoni. Kisha mama yake Ling aliaga dunia, na familia yake ilitarajia amwabudu kwenye sherehe ya mazishi yake. Hii ni desturi ya Kibuddha. Ling alijua kwamba alipaswa kumwabudu Mungu tu, na hivyo alikataa kuabudu kwenye madhabahu ya mama yake. Kwa sababu ya uamuzi huu, baba yake na ndugu zake walimkataa. Ingawa jambo hilo lilimhuzunisha sana Ling, aliendelea kumfuata Yesu kwa uaminifu. Aliendelea kuonyesha upendo kwa familia yake. Miaka mingi baadaye, walipoona kujitolea kwa Ling kumheshimu na kumtunza baba yao, familia yake ilimkubali tena. Uhusiano ulianza kuimarika, lakini familia ya Ling bado haiko tayari kumfuata Yesu. Ling bado anawaombea.

- Wakristo ‘walitayarishaje udongo’? Walifanya nini kabla ya kumwambia Ling kuhusu Yesu? (*alicheza mpira wa miguu, walitumia muda pamoja naye*)
- Sehemu gani ya hadithi ilikuwa ya ‘kupanda mbegu’? (*Walimposhirikisha injili na kumpa Biblia.*)
- Ilichukua muda gani kwa Ling kuwa Mkristo? (*miezi kadhaa*)
- Mungu alifanya nini wakati Wakristo wakisubiria chipukizi? Ni matatizo gani yaliyomfanya Ling asome Biblia? (*hakuweza kulala, wasiwasi juu ya pesa*)
- Ni sehemu gani ya hadithi ilikuwa ‘chipukizi jipya’? (*Ling alipomkubali Kristo*)
- Ni nani aliyetunza ‘chipukizi jipya’? (*Kundi la pili la Wakristo*) Walifanya nini ili kutunza chipukizi? (*walimwonyesha jinsi ya kumfuata Yesu katika nyanja zote za maisha*).
- Ling alionyesha matunda gani?
 - kusoma Biblia, alikuwa mwanafunzi
 - aliishirikisha injili katika familia yake
 - alikataa kumwabudu yeyote isipokuwa Mungu
 - alionyesha upendo baada ya kukataliwa
 - alimheshimu na kumjali baba yake

Ling alijifunza kuwapenda na kuwaamini baadhi ya Wakristo. Mungu aliwatumia watu hao ‘kupanda mbegu’ ya injili. Mungu alitumia matatizo ya Ling kumsaidia Ling kujua kwamba alimhitaji Mwokozi. Baada ya muda, Ling alitoa maisha yake kwa Yesu. Wakristo wengine walimsaidia kuendelea kukua na kuzaa matunda ya uadilifu na upendo.

TAFAKARI BINAFSI

- Mfikirie mtu mmoja au wawili katika maisha yako ambao bado hawamjui Yesu.
- Kila mtu yuko katika hatua gani? (Je, wana mioyo migumu? Je, wanapendezwa na mambo ya kiroho? Je, wanahisi hitaji la mwokozi? Je, wamemsikia Yesu ni nani? Je, wanajua maana ya kuwa Mkristo?)
- Mwombe Mungu ambacho anaweza kukufanya ufanye ili kuandaa udongo au kupanda mbegu.

TOA MREJESHO

Maagizo kwa Mwalimu: Alika watu kushirikisha wakitaka.

Mungu Hukuza Vitu

KIKUNDI KIKUBWA CHA MAJADILIANO

Soma tena Mathayo 28:19-20.

- Yesu anasema nini mwishoni mwa Agizo Kuu? (*Mimi nipo nawe siku zote*)
- Je, tunafanya kazi ya uinjilisti peke yetu? (*Hapana. Yesu yu pamoja nasi.*)

Yesu aliahidi kuwa pamoja nasi. Mungu Mwenyewe anafanya kazi katika shamba Lake pamoja nasi, ingawa hatuwezi kumwona.

Soma 1 Wakorintho 3:6

- Unapopanda mbegu, unaweza kulazimisha mimea kukua? (*Hapana*)
- Nani hufanya mimea kukua? (*Mungu*)

Kazi yetu kama wainjilisti ni kuwa ‘watenda kazi shambani’. Lakini hatuwezi kufanya vitu kukua. Mungu ndiye anayekuza maisha mapya. Hii ni habari njema! Hatupaswi kuwa na wasiwasi juu ya kufanya kila kitu sawa.

Hitimisho

Uinjilisti hauanzii kwa kumwambia mtu kuhusu Yesu. Haishii wakati mtu anaposema sala ya toba. Ni zaidi ya hayo. Uinjilisti ni mchakato mzima wa kuwaleta watu katika uhusiano na Mungu ili wawe wanafunzi. Kama kilimo, ni mchakato wa polepole. Mungu hututumia kusaidia kuandaa udongo wa mioyo ya watu. Anatumia sisi kupanda mbegu za injili. Anatumia kutunza machipukizi mapya yanapokua na kuzaa matunda.

- Tumia muda fulani kumshukuru Mungu kwa ajili ya watu na mazingira aliyoweka maishani mwako ambayo yalikusaidia kuja kwake.

Somo la 4: Maisha Yako Binafsi

Husaidia Kutayarisha Udongo

Lengo Kuu

Jinsi unavyoishi kama Mkristo kunaweza kuwafanya watu wapendezwe na injili. Kwa upande mwingine, inaweza kuwapa mtazamo mbaya juu ya Mungu wa Kikristo. Tunahitaji kujenga uhusiano na wasio Wakristo ili waone tofauti katika maisha yetu.

Nyenzo

- Kadi ya Mchakato wa Uinjilisti: Kutayarisha udongo

Utangulizi

KIKUNDI KIKUBWA CHA MAJADILIANO

- Je, mkulima mzuri angeweka mbegu kwenye ardhi ambayo haijatarishwa? Kwa nini?
- Ni jambo gani la kwanza ambalo mkulima atafanya?
- Je, kuna kitu kingine chochote anachoweza kufanya kabla ya kupanda mbegu?
- Mbegu zikipandwa kwenye udongo duni, hutokea nini?

Maagizo kwa Mwalimu: onyesha *Kadi ya Mchakato wa Uinjilisti: Kutayarisha Udongo*

- Kutayarisha udongo kwa ajili ya kupanda ni kama kuandaa mioyo ya watu kusikia injili.

Kama vile mkulima anavyotarisha udongo kabla ya kupanda mbegu, Mungu hututumia kuandaa mioyo ya watu kusikia injili. Anafanya hivi kwa njia tatu: (1) maisha yetu ya kila siku, (2) ushuhuda wetu, na (3) maombi. Leo tutaangalia ya kwanza – maisha yetu ya kila siku.

Maisha Yetu ya Kila Siku Yanaleta Tofauti

KIKUNDI KIKUBWA CHA MAJADILIANO

Mara baada ya Kanisa kuanzishwa, wasioamini waliona kwamba watu katika kanisa walikuwa tofauti. Kitabu cha Matendo kinazungumzia juu ya maisha katika Kanisa la kwanza.

Soma Matendo 2:42-47.

- Je, Wakristo hawa walikuwa wakifanya nini cha tofauti na wengine waliowazunguka? (*maajabu na ishara, walishirikisha kila kitu, walitoa kwa kila mtu anayehitaji, walikuwa na furaha*)
- Je, mambo haya hutokea kwenye ibada za Jumapili pekee, au pia mambo yanatokea katika maisha ya kila siku? (*maisha ya kila siku*)
- Watu waliowazunguka walihisije kuhusu Wakristo? (*walijawa na hofu, waliwaona wema*)
- Matokeo ya jinsi Wakristo walivyokuwa wakiishi yalikuwaje? (*watu wengi wanaokolewa*)

Tumeshajifunza jinsi ilivyo muhimu kufanya Matendo ya Upendo ili kuonyesha upendo wa Mungu kwa jumuiya yetu. Jinsi tunavyotenda katika shughuli zetu za kila siku pia ni muhimu sana.

Matendo ya Mathayo Yanawaambia Watu Kuhusu Yesu

Mathayo alifanya kazi katika shule ya sekondari. Wanafunzi na walimu wengi katika shule hiyo walikuwa Waislamu na Wahindu. Kulingana na sheria za nchi yake, Mathayo hakuruhusiwa kamwe kuongea kuhusu imani yake ya Kikristo kazini. Mathayo alitii sheria na hakuwahi kuwaambia watu kuhusu Yesu. Walakini, daima alimtendea kila mtu kwa haki. Alikuwa mwaminifu sana na alifanya kazi kwa bidii. Alikuwa na furaha, hata katika hali ngumu. Kila mara alitabasamu na kuwatia moyo wengine. Wafanyakazi wenzake walianza kumwendea Mathayo walipokuwa na matatizo. Walijua angewasiliza kwa upendo na kuwapa ushauri wenye hekima. Siku moja, mwanafunzi aliyekuwa Mwislamu alikuja kwa Mathayo na kusema, 'Najua wewe ni Mkristo, kwa sababu ninakuona wewe ni wa tofauti'.

- Unafikiri mwanafunzi alijua kwamba Mathayo alikuwa Mkristo?

KIKUNDI KIDOGO CHA MAJADILIANO

Maagizo ya Mwalimu: *Uliza swali na uorodheshe maeneo. Tumia vidokezo vya ziada (katika italiki) ikihitajika kama watu wanapata changamoto kufikiria mawazo.*

- Wakristo wanapaswa kufanyaje katika kila mojawapo ya mambo haya?
 - Kazini (*Mathayo alifanya nini ambacho kilikuwa kama Yesu? Ni njia gani nyingine ambazo mfanyakazi anaweza kutenda kama Yesu?*)
 - Nyumbani (*Kumbuka tulichojifunza kuhusu kusudi la Mungu kwa Ndoa na Familia.*)
 - Shuleni (*Unaweza kuonyesha upendo kwa wanafunzi wenzako? Mwalimu wako? Watoto wadogo?*)
 - Sokoni (*Je, Yesu angewalipisha watu kupita kiasi? Malipo duni? Kuiba?*)
 - Shambani (*Tunapaswa kutunzaje uumbaji wa Mungu? Tusaidie wengine? Mtazamo wetu unapaswa kuwaje juu ya kazi ngumu?*)

TOA MREJESHO NA MUHTASARI

Wakristo wanapaswa kuishi tofauti na watu wengine. Tunapaswa kuwa wakarimu na wenye upendo kwa wengine. Tunapaswa kuishi kwa uadilifu na unyenyekevu. Tukifanya hivyo, baadhi ya watu watakuwitiwa na Kristo na kutaka kumjua zaidi.

KIKUNDI KIKUBWA CHA MAJADILIANO

Ushuhuda wa Elam

Nilipokuwa mvulana huko Kongo nilisikia injili mara nyingi. Wakati fulani kutoka kwa watu waliokuwa wakitembea barabarani, au watu wakifundisha juu ya Yesu kwenye basi nililopanda. Nilijua nilikuwa mdhambi, lakini nilipofikiria baadhi ya mambo niliyokuwa nikifanya, nilijiambia, 'Hapana, kuwa Mkristo hakufai kuacha mambo haya'. Nilipokuwa sekondari, nilikutana na mvulana aliyekuwa tofauti na watu wengine. Maisha yake yalinivutia sana hivyo nilitaka kuwa rafiki yake. Niligundua kwamba alikuwa Mkristo. Nilivutiwa sana na jinsi alivyojismamia hivyo nilitaka kuwa kama yeye. Sikutaka kuacha tamaa zangu za dhambi, lakini jinsi rafiki yangu alivyokuwa akitenda na kuzungumza shuleni ilinivutia sana hivyo niliamua nilitaka Yesu awe Bwana wangu.

- Kwa nini Elamu alitaka kuwa Mkristo? (*Alitaka kuwa kama rafiki yake na rafiki yake alikuwa Mkristo*)
- Tusipojaribu kumtii Mungu katika kila eneo la maisha yetu, je, watu watakutwa kwa Kristo? (*Hapana*)

Kama Elamu, baadhi ya watu watakutwa na Kristo watakapoona ushahidi wa kazi Yake katika maisha yetu. Lakini mtu fulani akihubiri kuhusu Yesu na kila mtu anajua kwamba wanawatendea ukakitili watoto wao au kwamba

anawalaghai watu sokoni, watu watasema, ‘Dini yao haina tofauti. Wakristo ni kama kila mtu mwingine. Jinsi tunavyoishi kila siku ni sehemu muhimu ya ushuhuda wetu. Ni sehemu ya mchakato wa uinjilisti.

Kujenga Mahusiano na Wasio Wakristo

Maagizo kwa mwalimu: Soma hadithi zifuatazo.

Kumsaidia Kahaba

Katika jamii moja kulikuwa na msichana aliyekuwa yatima. Hakuwa na kipato, ujuzi, wala wazazi wa kumwongoza. Msichana huyo akawa kahaba ili aishi. Katika umri wa miaka 22, msichana alipata mimba. Ingawa alikuwa ameishi kijijini maisha yake yote, jamii ilimkwepa. Hakuwa na familia ya kumtunza wakati wa kujifungua ulipofika. Hakuwa na mtu wa kumsaidia mtoto wala kumwelekeza cha kufanya. Lakini wanawake wa kanisani walimtunza kahaba, alipokuwa hospitalini akijifungua mtoto. Alipomleta mtoto nyumbani, walihakikisha ana chai na chakula. Walimsaidia kufua nguo na kusafisha nyumba. Majirani waliogopa sana. Wakaambiana, ‘Yule msichana ni kahaba! Kwa nini wakina mama wa kanisani wamfanyie haya yote? Kwa nini wanazungumza naye?’ Lakini wanawake wa kanisa hilo wakaeleza, ‘Ameumbwa kwa mfano wa Mungu. Yeye ni muhimu sana Kwake.’ Kisha wanakijiji wakasema, ‘Kanisa linamwona kwa namna tofauti sana kuliko sisi. Tulimdharau na kufikiri “Mungu hamjui kwa sababu yeye ni kahaba, lakini kanisa linamwonesha upendo wake”’. Na wakampa Mungu utukufu. Msichana mwenyewe alinyenyekezwa na upendo wa kanisa, lakini hakuweza kuamini ikiwa alikuwa na thamani kwa Mungu. Alipokutana na mchungaji, alisema, ‘Mchungaji, najua kwamba mimi ni mdhambi, lakini mtoto wangu mchanga hana hatia. Tafadhali umwombee mtoto wangu’. Mchungaji aliomba na kumpa mtoto jina ‘Mungu Anaingilia’.

Mwanamke Mkristo Anakutana na Majirani zake

Katika jamii moja kulikuwa na Waislamu na Wakristo. Makundi tofauti hayakuwa na kawaida ya kuzungumza wao kwa wao. Siku moja iliyo na joto sana, mwanamke Mkristo aliona kwamba jirani yake Mwislamu alikuwa ameketi juani na watoto wake. Mwanamke huyo alisimama na kuzungumza na familia ya Kiislamu. Aligundua kwamba walikuwa wamefungiwa nje ya nyumba yao. Aliwaalika watu wa familia hiyo wajipumzike nyumbani kwake, lakini walikataa. Basi akaenda nyumbani na kurudi na maji baridi. Tena akawaalika nyumbani kwake. Hatimaye familia ikaja na kukaa mpaka mume wa mwanamke huyo Mwislamu akarudi na kuwapeleka nyumbani. Baada ya hapo, wanawake hao wawili mara nyingi walitumia muda pamoja. Watoto wao walicheza pamoja, na familia zao zilikula pamoja.

KIKUNDI KIDOGO CHA MAJADILIANO

- Katika hadithi ya kwanza, je, wakina mama wa kanisa walifanya jambo sahihi la kujenga uhusiano na kahaba? Kwa nini?
- Katika hadithi ya pili, je, mwanamke Mkristo alifanya jambo sahihi la kujenga uhusiano na mwanamke wa Kiislamu? Vipi kuhusu kuwaruhusu watoto wake kucheza na watoto wa Kiislamu?
- Wakristo wanaweza kuwa na wasiwasi gani kuhusu kujenga uhusiano na wasioamini?

TOA MREJESHO

KIKUNDI KIKUBWA CHA MAJADILIANO

Soma mistari ifuatayo kuhusu Yesu kujenga uhusiano na wasioamini.

Soma Yohana 4:4-18

- Yesu alikuwa akiwahubiria watu wangapi katika kifungu hiki? (*mmoja*)
- Je, mwanamke huyo alikuja kumtafuta Yesu? (*Hapana*)
- Nani alianzisha mazungumzo? (*Yesu*)
- Kwa nini mwanamke huyo alishangaa kwamba Yesu alizungumza naye? (*kwa sababu alikuwa Msamaria na mwanamke*)

Soma Mathayo 11:19

- Nani walikuwa marafiki wa Yesu? (*wenye dhambi na watoza ushuru*)
- Alifanya nini na marafiki hawa? (*Alikula na kunywa nao*)
- Je, angeweza kufanya hiyo kwa kukaa hekaluni na kungoja wamfuate? (*Hapana, lazima aende kwao*)

Yesu aliwaendea wenye dhambi, akazungumza na kula nao. Alifanya hivyo bila kujali sifa zao zilikuwaje. Alijenga urafiki nao, ingawa watu walishangazwa kwa hilo.

KIKUNDI KIDOGO CHA MAJADILIANO

- Fikiria sababu ambazo Wakristo wanaweza kusitasita kujenga uhusiano na wasioamini. Yesu angefanya nini katika kesi hizo?
- Kanisa letu lifanye nini kujenga uhusiano na wasioamini? Au kama watu binafsi?

TOA MREJESHO

KIKUNDI KIKUBWA CHA MAJADILIANO

- Chagua kitu unachoweza kufanya kama kanisa kujenga mahusiano na wasioamini katika jumuiya yako.

Hitimisho

Tukimtii Mungu katika kila eneo la maisha yetu, watu watataka kumjua Yesu. Lakini tukiishi kama ulimwengu mwingine, hatutawaleta watu kwa Mungu. Watu wanahitaji kuona utofauti ambayo Kristo ameufanya ndani yetu kabla ya kusikiliza maneno yetu kuhusu Habari Njema. Wasioamini hawataona tunavyoishi tusipowafahamu. Tunapaswa kujenga uhusiano nao, kama Yesu alivyofanya.

TAFAKARI BINAFSI

- Muulize Mungu kimya kimya ikiwa kuna jambo lolote unahitaji kubadilisha ili upate heshima Yeye katika maeneo yote ya maisha yako. Tumia dakika moja kumsikiliza Roho Mtakatifu.
- Muulize Mungu kama kuna jambo unalopaswa kufanya ili kuanza kujenga uhusiano na asiye Mkristo. Tumia dakika moja kusikiliza ili kuona kama anakupa wazo.

Somo la 5: Ushuhuda Wako

Husaidia Kutayarisha Udongo

Lengo Kuu

Ukiwa tayari kushirikisha, Mungu anaweza kutumia ushuhuda wako kufanya mtu apendezwe na injili.

Nyenzo

- Kadi za Mchakato wa Uinjilisti (kutayarisha udongo) na (chipukizi jipya)
- Kitu cha kurusha na kukamata (kwa mfano, karatasi iliyokunjwa)

Mwezesaji kumbuka: Kuwa tayari kushirikisha ushuhuda wako.

Utangulizi

KIKUNDI KIKUBWA CHA MAJADILIANO

Hebu turudie kwa muda.

- Mwinjilisti ni nani? (*kila muumini*)
- Lengo la uinjilisti ni lipi? (*Kuwaleta watu katika uhusiano na Mungu ili wawe wanafunzi*)
- Je, uinjilisti ni kitendo cha mara moja tu, au ni mchakato mrefu? (*mchakato*)

Maagizo ya Mwalimu: Onyesha *Kadi za Mchakato wa Uinjilisti: Kutayarisha udongo*

- Ni njia gani ya kwanza tulijifunza kwamba Mungu anaweza kututumia kutayarisha udongo wa mioyo ya watu? (*maisha yetu ya kila siku na mahusiano*)

Watu wanapoona kwamba Wakristo ni wa tofauti, baadhi watavutiwa kwetu. Watataka kujua kinachotutofautisha.

- Je, kuna mtu amewahi kukuuliza kwa nini wewe ni wa tofauti?
- Je, ulijisikiaje walipokuuliza?
- Ulijibuje? Ulisema nini?

Kuwa tayari Kushirikisha

SHUGHULI YA KIKUNDI KIKUBWA

Maagizo ya Mwalimu: Liite jina la mtu darasani. Rusha *kitu* (kwa mfano karatasi iliyokunjwa) kuelekea kwao huku ukisema, 'kamata'!

- Wakiipata, sema 'Oh, ulikuwa tayari!'
- Wasipoipata, sema 'Loo, hukuwa tayari!'

Soma 1 Petro 3:15.

- Aya hii inaamuru nini? (*mheshimu Kristo; uwe tayari kutoa jibu*)

KIKUNDI KIKUBWA CHA MAJADILIANO

Kwa Nini Una Furaha Sana?

Joy alienda kutembea mara kadhaa kwa wiki na jirani yake, Van. Van hakuwa Mkristo. Siku moja, Joy alikuwa anakula kifungua kinywa kwenye kibanda cha nje karibu na nyumba yake. Van alifika na kuketi. Joy alimsalimia kwa furaha. Van akasema, 'Joy, kwa nini una furaha kila wakati?' Joy alishangazwa na swali hilo. Alikuwa akimwombea Van, lakini hakuwahi kufikiria la kusema ikiwa Van angemuuliza kuhusu nini kilimfanya kuwa tofauti na watu wengine. Hakujuua cha kusema. Akasema kwa kigugumizi, 'oh, nadhani kwa sababu Mungu ananipenda'. Baadaye siku hiyo, Joy aliamua kwamba alihitaji kutayarisha jibu bora zaidi.

Unaweza kuwa na uhakika kwamba Mungu atakupua nafasi ya kushirikisha ushuhuda wako ukiwa tayari kufanya hivyo. Huenda hutawahi kumsikia mtu akisema, 'Sababu ya tumaini ulilo nalo ni nini?' Lakini huenda wakasema:

- 'Kwa nini una furaha wakati wote?'
- 'Kwa nini usiende kwa mganga? Huogopi mapepo?'
- 'Ulifanyaje hadi watoto wako wana heshima kiasi hicho?'
- 'Naweza kukuambia wewe ni Mkristo. Ni nini kinachokufanya uwe tofauti?'

Sababu Yako ya Matumaini

KIKUNDI KIKUBWA CHA MAJADILIANO

Mtu akionekana kupendezwa na kwa nini wewe ni tofauti, huo ni wakati mzuri wa kushirikisha ushuhuda wako. Ushuhuda wako ni hadithi yako juu ya Yesu kukupa maisha mapya. Unaelezea kwa nini wewe ni mtu tofauti kuliko ungekuwa bila Yesu. Sikiliza hadithi hii kutoka Yohana sura ya 9.

Soma Yohana 9:6-12

- Je, yule kipofu alikuwa tayari kushirikisha kile ambacho Yesu alifanya naye kwa yeyote aliyeuliza? (*ndiyo*)
- Yule kipofu alisema nini ambacho Yesu alimfanyia? (*Nilikuwa kipofu. Sasa naona.*)

'Nilikuwa kipofu. Sasa naona.' ni ushuhuda wa yule kipofu.

Soma Matendo 26:9-16

- Paulo alikuwa mtu wa namna gani kabla ya kukutana na Yesu? (*aliwatesa Wakristo*)
- Paulo alikuwaje tofauti baada ya Yesu kumbadilisha? (*aliwaambia watu kuhusu Yesu*)

'Niliwatesa Wakristo, lakini Yesu aliniweka kuwa mtumishi na shahidi' huo ni ushuhuda wa Paulo.

Soma Matendo 3:6-10

- Je, ushuhuda wa mtu aliyeponywa unaweza kuwaje? (*Nilikuwa kilema. Sasa naweza kutembea.*)

Hebu tusome hadithi ya Ling tena.

Ling

Ling alikulika katika familia ya Wabudha. Alipokwenda chuo kikuu, alikuwa na changamoto ya kulipa ada. Familia yake haikuwa tajiri. Mara nyingi alihangaikia sana pesa na iwapo angeweza kumudu kuendelea na masomo yake hivyo hakuweza kulala usiku. Alijaribu kila njia kupata usingizi mzuri, lakini alishindwa kabisa. Siku moja, alikutana na kikundi cha Wakristo wakicheza mpira wa miguu. Walimwalika ajiunge kucheza na kujumuika nao baadaye kwa kahawa. Hatimaye, pia walimshirikisha injili Ling na kumpa Biblia. Ling hakutaka kuwa Mkristo. Lakini, usiku mmoja akiwa macho akiwa na wasiwasi, aliamua kujaribu kusoma Biblia. Baada ya kusoma Biblia kwa muda kidogo, alihisi amani na akaweza kulala usiku mzima. Aliendelea kusoma Biblia ili alale kwa amani kila usiku. Marafiki zake wa

soka waliondoka jijini, lakini wakamtambulisha Ling kwa Wakristo wengine ambao wangeweza kujibu maswali yake. Wakristo hawa wakawa marafiki zake pia. Baada ya miezi kadhaa na kusoma injili nne, Ling alimkubali Kristo kama Mwokozi wake.

- Ling alikuwa na tatizo gani? (*Alikuwa na wasiwasi hivyo hakuweza kulala*)
- Yesu alimbadilishaje? (*Kusoma Biblia kulimsaidia alale kwa amani.*)
- Ushuhuda wa Ling ni upi? (*Nilikuwa na wasiwasi sana sikuweza kulala, lakini Yesu alinipa amani.*)

MUHTASARI

Katika ushuhuda wetu, tunawaambia watu jinsi maisha yetu yalivyo tofauti kwa sababu ya Yesu. Ushuhuda unaweza kuwa jinsi Yesu alivyokubadilisha, ulipokuwa Mkristo mara ya kwanza, lakini si lazima iwe hivyo. Unaweza pia kuzungumzia njia ambayo Mungu amekusaidia kubadilika hivi karibuni.

KIKUNDI KIKUBWA MAJADILIANO

Ushuhuda wa Joy

Nilipokuwa mdogo niliamua kumfuata Yesu. Tangu wakati huo, Yesu amekuwa akinisaidia kuwa mtu bora zaidi. Kwa mfano, uliuliza kwa nini nina furaha sana. Nilipokuwa mdogo nilifikiri kwamba ikiwa ningefanya kila kitu sawa, ingethibitisha kwamba mimi ni muhimu na wa thamani. Nilihisi vibaya nilipofanya vibaya shuleni, na nilifurahi sana nilipofanya vizuri. Yesu alinisaidia kutambua kwamba kufanya vizuri au vibaya shuleni hakunifanyi kuwa mtu wa thamani zaidi au ndogo kuliko watu wengine. Tayari mimi ni muhimu Kwake. Hicho ndicho kinachonifurahisha. Ninaweza kutumia vipaji vyangu kusaidia watu wengine badala ya kuvitumia kujaribu kuonesha jinsi nilivyo bora. Ningefurahi kukuambia zaidi juu ya Yesu ikiwa una shauku.

- Joy alikumbana na tatizo gani? (*alijisikia vibaya alipofanya vibaya shuleni*)
- Alibadilikaje kwa sababu ya Yesu? (*Alimsaidia kuona kwamba alikuwa muhimu na wa thamani kwake. Sasa ana furaha.*)

Ushuhuda wa Mwalimu / Mwezeshaji

Toa ushuhuda wako mwenyewe.

*Hakikisha ni rahisi na mfupi ili iwe rahisi kwa wanafunzi kufuata mfano wako.
Malizia kwa, 'Ikiwa una nia au shauku, naweza kukuambia zaidi kuhusu Yesu'.*

- Nilikumbana na tatizo gani?
- Nilibadilikaje kwa sababu ya Yesu?

SHUGHULI BINAFSI

Sasa ni zamu yako kuandaa ushuhuda wako mwenyewe. Unapaswa kueleza jinsi ulivyo tofauti kwa sababu ya Yesu. Fikiria juu ya maswali haya.

- Yesu amekusaidia kwa hofu au matatizo gani? (kwa mfano: afya, mahusiano, hofu, matatizo)
- Maisha yako yana tofauti gani kwa sababu ya Yesu?

Toa takriban dakika 10 za ukimya kwa watu kuandaa ushuhuda.

SHUGHULI YA KIKUNDI KIDOGO

Nenda katika vikundi vidogo vya watu 2–3 na shirikishane shuhuda. Baada ya ushuhuda wako, jitolee kushirikisha zaidi kuhusu Yesu.

TOA MREJESHO

- Ulijisikiaje kusikia hadithi za watu?
- Ulijisikiaje kushirikisha hadithi yako? Ilikuwa vigumu au rahisi kushirikisha?

Hitimisho

Maagizo kwa Mwalimu: *Wahimize watu kushirikisha shuhuda zao na kundi zima. Waruhusu hadi mwisho wa muda wa darasa. Hili ni zoezi zuri la kushirikisha ushuhuda wao.*

Tumeitwa kuwapa watu wengine tumaini sawa na sisi. Mungu atatupa nafasi za kushirikisha kile ambacho Yesu ametutendea. Lazima tuwe tayari kufanya hivi.

Somo la 6: Maombi Husaidia Kutayarisha Udongo

Lengo Kuu

Maombi ni sehemu muhimu ya uinjilisti. Tunaweza kumwomba Mungu kuwatayarisha watu kuitikia injili. Tunaweza kuomba pamoja na wasioamini kuhusu mahitaji yao. Na tunaweza kuomba kwa ajili ya nafasi za kuonesha upendo wa Mungu na kushirikisha injili.

Nyenzo

- Kadi ya Mchakato wa Uinjilisti: Kutayarisha udongo

Utangulizi

KIKUNDI KIKUBWA CHA MAJADILIANO

Maelekezo kwa Mwalimu: Onesha Kadi ya Mchakato wa Uinjilisti: Kutayarisha udongo.

- Ni njia gani mbili za kwanza ambazo Mungu anatumia kutayarisha udongo? (*maisha yetu ya kila siku, ushuhuda wetu*)

Maombi ni njia nyingine ya kuandaa udongo wa mioyo ya watu.

KIKUNDI KIDOGO CHA MAJADILIANO

- Ni watu gani wasioamini umekuwa ukiwaombea? Umekuwa ukiwaombea kwa muda gani?
- Huwa unawaombeaje wasioamini? Baadhi ya mambo gani makuu unayoombea?

TOA MREJESHO

Leo tutaangalia njia tatu ambazo tunaweza kuwaombea wasioamini.

- 1) Omba kwamba Mungu awaweke tayari kuitikia injili.
- 2) Omba pamoja na wasioamini.
- 3) Ombea nafasi za kushirikisha na kuonesha upendo wa Mungu.

Omba ili Mungu Awaweke Watu Tayari Kuitikia

KIKUNDI KIKUBWA CHA MAJADILIANO

Kumbuka kwamba hatufanyi uinjilisti peke yetu. Hatuwezi kumlazimisha mtu kuwa Mkristo. Ni Mungu pekee anayeweza kuwafanya kuwa tayari kuitikia injili.

Soma Luka 18:13, Yohana 6:44, na Matendo 16:14

- Kutokana na mistari hii, tunawezaje kuwaombea wale tunaajaribu kuwafikia? (Ombeni ili Mungu afungue mioyo yao)

Ron na Rita

Muda mfupi baada ya Rita na Ron kufunga ndoa, Rita alianza kwenda kanisani na akawa Mkristo mwenye nguvu. Alimshirikisha Ron imani yake, lakini Ron hakuenda kanisani. Ron hatimaye aliachana na Rita. Hakuweza hata

kuzungumza naye. Rita aliendelea kumuomba Ron kila siku. Alimwomba Mungu amfanye Ron kuwa tayari kuitikia injili. Rafiki mwingine kutoka kanisa la Rita alimwalika Ron mara kwa mara kwa chakula cha mchana. Mtu huyu alizungumza na kusali na Ron pia. Baada ya miaka mingi, Ron akawa rafiki na mwanamume mwingine Mkristo aliyekutana naye wakati wa darasa la kareti. Mwanaume huyo Mkristo pia alimwambia Ron kuhusu Yesu. Hatimaye, miaka kumi baada ya talaka yake, Ron aliitikia injili. Akawa mwenye furaha badala ya hasira na huzuni. Alijiunga na kanisa na kupatanishwa na Rita. Alianza kushirikisha imani yake kwa watu hadi alipofariki.

- Mungu alwaitumiaje watu kutayarisha udongo wa moyo wa Ron? (*Rita akiomba, kushirikisha, wengine kuomba na kuwa marafiki*)
- Je, Mungu alijibu maombi ya Rita? Je, alifanya kazi katika moyo wa Ron? (*ndio*)
- Kingempata nini kwa Ron ikiwa Rita, rafiki yake wa kanisani, na yule mwanamume Mkristo mwingine wasingendelea kusali na kuzungumza na Ron na kuwa marafiki naye, hata kama hakujiibu? (*asingemjua Mungu*)
- Je, kuna watu ambao umekuwa ukiwashirikisha au kuwaomba ambao bado si Wakristo?

MUHTASARI

Tunapomwomba mtu asiyemjua Mungu, tunapaswa kuomba kwamba Mungu awaweke tayari kuitikia injili. Ni lazima tuendeleo kuomba na tusikate tamaa. Mwishoni mwa somo la leo, tutatumia muda kuwaomba watu hao.

Omba Pamoja na Watu kwa Mahitaji Yao

KIKUNDI KIKUBWA CHA MAJADILIANO

Njia nzuri ya kuandaa udongo wa moyo ya watu ni kuomba nao kuhusu mahitaji au matatizo yao. Hebu tusome hadithi mbili.

Mjane Aliyeonesha Matunda

Unamkumbuka Nagamani? Kanisa lilianza kumtunza kama familia. Walimpa cherehani. Walilipia elimu ya mtoto wake. Nagamani alipokuwa na huzuni sana, kanisa lilisali naye. Kwa sababu aliona jinsi kanisa lilivyompenda ingawa hakuwa Mkristo, Nagamani alitoa maisha yake kwa Yesu. Alitoka kwenye unyogovu wake. Alianza kuhudhuria ibada. Alichangia pesa katika hazina ya kanisa kwa ajili ya Matendo ya Upendo. Sasa anafundisha wasichana kutoka kijijini kushona ili waweze kujikimu. Pia husaidia kuandaa chakula kwa wajane wengine kanisani. Wakati mwingine yeye huwapa sari pia.

Mungu Anajibu Maombi ya Vijana

Kama mradi wa huduma, jozi ya vijana walitembelea nyumba hadi nyumba katika kitongoji fulani. Walikuwa vijana, na wengi wao hawakuwa wametembelea na kusali pamoja na wasio Wakristo hapo awali. Walikuwa na wasiwasi kwamba hawatajua jinsi ya kuzungumza na watu au kusali pamoja nao. Katika nyumba moja, mtoto alimwambia kijana huyo kwamba baba yake alikuwa mlevi. Kijana huyo aliomba kwamba angeacha kunywa pombe na kurudia familia. Kabla hawajamaliza kuomba, baba aliingia ndani ya nyumba na kusema anataka kutubu na kumpa Yesu maisha yake.

- Nagamani alipokuwa amehuzunika, je, watu wa kanisa walimwomba kwenye mkutano wa maombi, au walimwendea na kuomba PAMOJA naye? (*waliomba naye*)
- Vijana walihisije kuhusu kuomba na watu? (*wasiwasi*)
- Je, Mungu alijibu maombi yao? (*ndiyo*)
- Je, walihitaji kuwa na maneno kamili? (*Hapana*)

Ni kawaida kuwa na woga kuhusu kutoa ili kuomba pamoja na asiyeamini. Hapa kuna baadhi ya mambo ya kukumbuka.

- Maombi ni kuzungumza na Mungu kuhusu utunzaji wako wa kweli kwa mtu huyo.
- Maombi yako yawe mafupi.
- Usijali kama Mungu atajibu au la. Amini kwamba Mungu anasikiliza maombi yako.

KIKUNDI KIDOGO CHA MAJADILIANO

- Je, umewahi kujitolea kusali pamoja na mtu ambaye hakuwa Mkristo? Mwitikio wao ulikuwaje?
- Kuna faida gani za kuomba pamoja na asiyeamini?
- Kitu gani kinachoweza kufanya iwe vigumu kusali pamoja nao?

TOA MREJESHO

KIKUNDI KIKUBWA CHA MAJADILIANO

Jirani wa Sarah

Kulikuwa na mwanamke katika mtaa wa Sara ambaye mume wake aliiacha familia yao. Sara aliomba pamoja na jirani yake kwamba Mungu aiponye ndoa hiyo na mumewe arudi. Mume wa jirani hakurudi. Badala yake, alimtaliki. Sarah na mume wake waliendelea kuwapenda jirani zao. Sarah alisaidia kuwatunza watoto. Mume wa Sarah alisaidia kurekebisha mambo kuzunguka nyumba na mali. Ingawa maombi hayakujibiwa kama alivyotarajia, jirani wa Sarah angeweza kusema jinsi Sarah alivyojali.

- Je, Mungu alijibu maombi ya Sara jinsi alivyotarajia?
- Maombi yake yalipokuwa hayajajibiwa kama alivyotarajia, Sarah na mume wake walifanya nini?
(aliendelea kuonesha upendo)

Ikiwa Mungu hajibu maombi unayomwomba mtu asiyeamini, usijali. Hapa kuna mambo unayoweza kuyafanya:

- Waambie jinsi unavyohuzunika kwamba wanapaswa kupitia haya.
- Shirikisha jinsi Mungu alivyokusaidia katika wakati mgumu uliopitia.
- Wahakikishie upendo wa Mungu kwao.
- Fanya uwezavyo kuwasaidia (Mungu alikutuma wewe kama mwakilishi wake).

MUHTASARI

Kuomba pamoja na watu wengine huwajulisha kuwa unawajali. Inawaonyesha kwamba unamwamini Mungu. Hatupaswi kuwa na maneno kamili. Tunaweza kuamini kwamba Mungu anafanya kazi katika maisha ya watu. Hii ni kweli hata kama hajibu maombi kama tulivyotarajia. Na kama akijibu maombi, wanaweza kuona nguvu zake!

Ombea Fursa

KIKUNDI KIKUBWA CHA MAJADILIANO

- Nani anayekumbuka mambo mawili ya kwanza tuliyosema kuhusu maombi kwa ajili ya wasioamini?
(ombeni ili Mungu awaweke tayari kwa ajili ya Injili, ombeni pamoja nao kwa mahitaji yao)

Hapa kuna jambo moja zaidi tunaloweza kuliombea.

Soma Matendo ya Mitume 4:23-31.

- Waumini wanaombea nini? (*ujasiri na miujiza kuonyesha uweza na utukufu wa Mungu*)

Soma Wakolosai 4:2-6

- Paulo anawaomba Wakristo wa Kolosai waombe nini? (*kufungua mlango, maneno sahihi, fursa*)

Mungu anaweza kuleta fursa kwetu, kuonyesha upendo Wake, na kushirikisha injili. Anaweza kutupa maneno ya kusema. Anaweza kutupa ujasiri wa kusema, hata katika hali ngumu. Sikiliza hadithi hii, ambayo unaweza kuikumbuka kutoka kwenye Moduli ya 1.

Kuhudumia Mke wa Mwanachama wa Genge

Katika jumuiya moja, kanisa liliamua kufanya Tendo la Upendo. Waliomba juu ya nini cha kufanya na walihisi kwamba Mungu alikuwa akiwaambia wamsaidie mke wa kiongozi wa genge katika eneo hilo. Waliogopa, kwani kiongozi wa genge hilo alikuwa na sifa ya kukasirika sana na kuwapiga watu bila sababu. Hata hivyo, kanisa lilitaka kumtii Mungu. Walingoja hadi kiongozi wa genge hilo alipokuwa nje ya mji, kisha wakamsaidia mke wake kuvuna mashamba na kuandaa mazao ya kuuza. Kiongozi wa genge aliporudi nyumbani, aliona mazao yote yamevunwa na kuanza kupaza sauti, “Ni nani aliyefanya hivi?” Mkewe aliogopa kumwambia, akiogopa kwamba angeweza kufanya fujo, lakini hatimaye akakiri kwamba kanisa lilikuwa limesaidia. Kiongozi wa genge hilo aliondoka kwa nguvu hadi kanisani na kugonga mlango. Baada ya kuwaita mashemasi, kasisi alifungua mlango, na kiongozi wa genge akaingia. ‘Kwa nini mlifanya hivyo?’ akauliza. Walijibu kwamba walitaka tu kuonyesha upendo wa Mungu. Mwanamume huyo alianza kulia, akishirikisha kwamba hakuna mtu aliyewahi kumpenda hapo awali katika maisha yake. Walimshirikisha habari za Yesu mtu huyo. Akawa Mkristo, akageuza maisha yake, na kuendelea kuongoza familia sita zaidi kutoka kwenye genge hadi kwa Kristo.

- Waumini waliombea nini? (*kitendo gani cha Upendo cha kufanya*)
- Je, Mungu aliwapa ujasiri? (*ndiyo*)
- Je, Mungu aliwapa nafasi ya kushirikisha injili? (*ndiyo*)

Tunapaswa kumwomba Mungu atupe fursa za kuonyesha upendo Wake na kushirikisha injili. Atatupatia fursa kwa wakati ufaao.

Hitimisho

Maelekezo kwa Mwalimu : Onesha Kadi za Mchakato wa Uinjilisti: Kutayarisha udongo.

Mungu anatutumiaje kusaidia kuandaa udongo wa mioyo ya watu?

- Maisha yetu ya kibinafsi
- Shuhuda zetu
- Maombi yetu

Ni njia gani tatu tulizojifunza za kuwaombea wasioamini?

- Omba kwamba Mungu awaweke tayari kuitikia injili
- Omba nao kwa ajili ya mahitaji yao
- Omba nafasi za kushirikisha na kuonyesha upendo wa Mungu

MAOMBI KATIKA KIKUNDI KIDOGO

Gawa vikundi vya watu 2-3, na utumie dakika chache kuwaombea wasioamini unaowajua. Pia tuombeane, kwa fursa, hekima, na ujasiri.

Somo la 7: Fursa za Kupanda

Lengo Kuu

Mungu anaweza kutoa fursa za kushirikisha injili tunapofanya Matendo ya Upendo na tunapozungumza na watu.

Nyenzo

- Kadi ya Mchakato wa Uinjilisti: Kupanda mbegu
- Igizo - Yesu na Mwanamke Msamaria (nakala 2)
- Igizo - Kufanya Kazi kwa Bidii (nakala 2)

Utangulizi

Maelekezo kwa Mwalimu: Ngoja Kadi za Mchakato wa Uinjilisti: Kupanda mbegu.

Leo tutaanza kuzungumzia kupanda mbegu za injili. Mungu atatoa nafasi za kushirikisha injili. **Tunajua tuna nafasi ya kushirikisha injili wakati watu wana nia ya kujifunza zaidi kuhusu Yesu.**

KIKUNDI KIDOGO CHA MAJADILIANO

- Ni nini kilikufanya upendezwe na Yesu?
- Je, unakumbuka mazungumzo yoyote uliyokuwa nayo kuhusu Yesu kabla ya kuwa Mkristo?
- Ulikuwa na shida au hitaji?

TOA MREJESHO

KIKUNDI KIKUBWA CHA MAJADILIANO

Kumbuka hadithi za uinjilisti ambazo tumezisikia:

- Ling hakuweza kulala. Alipendezwa na Biblia kwa sababu ilimfanya ahisi amani ili aweze kulala.
- Nagamani alihisi hana sababu ya kuishi baada ya mumewe kufariki. Alikuwa na nia ya kuwa Mkristo kwa sababu ya njia ambazo kanisa lilimtendea kama familia na kusaidia kukidhi mahitaji yake.

Somo hili linahusu kutafuta nafasi za kushirikisha injili. Mara kwa mara hii hutokea kwa sababu tunaweza kuhusianisha uzoefu na mahitaji ya watu. Tutaangalia hasa maeneo mawili ambapo Mungu anaweza kutoa fursa:

- kupitia Matendo ya Upendo
- kupitia mazungumzo

Bado hatushirikishi injili, lakini tunazingatia kuona kama watu wana nia ya kujifunza kuhusu Yesu.

Fursa Kupitia Matendo ya Upendo

KIKUNDI KIKUBWA CHA MAJADILIANO

Familia Yenye Huzuni

Familia isiyo ya Kikristo huko Segdaya, Benin, ilipoteza mtoto wao wa miaka 4. Huzuni yao ilikuwa kali sana hata ingawa mashamba yao ya mahindi yalikuwa tayari kuvunwa, hawakuweza kufanya lolote zaidi ya kuomboleza. Waumini wa kanisa walikwenda kwenye shamba lao, wakavuna mahindi yote, na kuyaleta nyumbani. Familia ilishangaa na kuguswa sana. Waliuliza, 'Kwa nini mnafanya hivi?' Kasisi akawaambia, 'Tuliona jambo lililowapata, na tunataka tu kuwaonyesha kwamba ingawa mlifiwa na mtoto wenu, bado upendo wa Mungu uko kwenu.'

Tunawapenda. Mungu anakupenda. Tunataka tu kuonesha upendo wa Mungu kwenu'. Hawakuialika familia kuhudhuria kanisani, lakini Jumapili iliyofuata, familia nzima ya watu 12 ilikuja kanisani. Wakasema, 'Tupo hapa kwa sababu mlitusaidia na kutuonyesha upendo. Tumekuja hapa kwa sababu tunataka kuwashukuru tena, na pia tunataka kumwabudu Mungu mnayemwabudu'.

- Nini kilitokea katika hadithi hii?
- Kwa nini familia hiyo ilitaka kumwabudu Mungu? (*kwa sababu kanisa liliwaonyesha upendo*)
- Unafikiri familia ingekuwa na jibu sawa ikiwa mchungaji angewaambia tu kwamba walihitaji kutubu na kumpokea Yesu? (*labda sivyo. Walihuzunika sana.*)

Matendo ya Upendo mara nyingi huwafanya watu waulize 'Kwa nini unafanya hivi?' Tunaweza kuwashirikisha kuwa sababu ya kuwasaidia ni kwa sababu unataka kuwaonyesha upendo wa Mungu.

Hata kama watu tunaowatumikia kamwe hawayatoi maisha yao kwa Yesu, bado tunawaonyesha upendo. Hii ni njia ya kumtii Mungu na kumtukua. Hata hivyo, mara nyingi Mungu hutumia Matendo ya Upendo kuwafanya watu wapendezwe na Yesu. Iwapo watu wanaonekana kutaka kusikia zaidi, tunaweza kuwa tayari kushirikisha injili.

Fursa kupitia Mazungumzo

KIKUNDI KIKUBWA CHA MAJADILIANO

Mungu pia anaweza kutoa fursa kupitia mazungumzo ya kawaida. Hapo awali, tulisoma simulizi ya mazungumzo ya Yesu na mwanamke Msamaria. Tukisoma zaidi, tunaweza kuona kwamba Yesu anamleta Mungu wakati wa mazungumzo.

Maelekezo kwa Mwalimu: Waombe watu wawili wasome igizo lifuatalo (*Sio lazima kuigiza.*)

Yesu na Mwanamke Msamaria (imetolewa kutoka Yohana 4:4-26)

Yesu:	Je, unaweza kunipatia maji ya kunywa?
Mwanamke:	Imekuwaje wewe, Myahudi, kuniomba maji, mimi mwanamke Msamaria?
Yesu:	Kama ungejua jinsi Mungu alivyo mkarimu, na mimi ni nani, ungeniomba maji, nami ningekupa maji safi, ya uzima.
Mwanamke:	Bwana, huna hata ndoo ya kuchotea, na kisima hiki ni kirefu. Kwa hivyo utayapataje hayo 'maji ya uzima'? Je, wewe ni mkuu kuliko babu yetu Yakobo, ambaye alichimba kisima hiki? Yakobo na wanawe na wanyama wake walikunywa katika kisima hiki, na alitupatia.
Yesu:	Kila mtu anayekunywa maji haya ataona kiu tena na tena. Yeyote anayekunywa maji ninayompa hataona kiu kamwe. Maji nitakayompa yatakuwa kama chemchemi, itakayobubujika maji yenye uhai na kumpa uzima wa milele.
Mwanamke:	Nipe maji haya, ili nisipate kiu tena!

- Yesu alianzaje mazungumzo? (*kuomba maji*)
- Je, alizungumza tu kuhusu maji, au alimleta Mungu kwenye mazungumzo? (*alizungumza juu ya Mungu*)

- Je, Yesu alisema angeweza kumpa mwanamke nini ambacho ni bora kuliko kile alichonacho sasa? (*maji ya uzima - hayana kiu kamwe*)
- Je, mwanamke huyo alionekana kupendezwa na yale ambayo Yesu alikuwa akisema? (*ndiyo*)

Mtume Paulo alienda mahali pa hadhara huko Athene ili kushirikisha injili. Soma Matendo 17:22-23.

- Paulo alikuwa anazungumzia nini alipomwongelea Mungu? (*kuabudu sanamu*)

Soma Matendo 17:32-34.

- Watu waliitikiaye Paulo alipowashirikisha? (*wengine walipendezwa, wengine hawakupendezwa*)

Maelekezo kwa Mwalimui: Waombe watu wawili wasome **igizo** lifuatalo. (kuigiza sio lazima)

Kazi ngumu

Simon:	Hii ni kazi ngumu! Je, unajua kwamba Mungu alipoumba dunia kwa mara ya kwanza ilikuwa rahisi kulima chakula? Hakukuwa na dhoruba au mafuriko au ukame. Adamu, ambaye alikuwa mtu wa kwanza kuumbwa na Mungu, alilima ardhi lakini haikuwa kazi ngumu. Hivyo ndivyo Biblia inavyosema.
Marko:	Kweli. Kwa nini ni ngumu sana sasa?
Simon:	Ni ngumu kwa sababu ya mambo yote mabaya tunayofanya. Biblia inayaita mambo haya dhambi. Mungu aliwaambia Adamu na mke wake Hawa wasile tunda la mti maalum. Lakini hawakumtii na wakala. Tangu wakati huo kilimo kimekuwa kazi ngumu. Lakini siku moja, Mungu atafanya kila kitu kuwa kipya. Hakuna dhambi tena! Ningeweza kukuambia zaidi ikiwa una nia.

- Simoni alikuwa anazungumzia nini alipomwongelea Mungu? (*kazi ngumu shambani*)

Yesu, Paulo, na Simoni wote walitumia mazungumzo ya kila siku ili kuanza kuzungumza juu ya Mungu. Walijaribu kuwafanya watu wamuulizie Mungu. Mtu yeyote anaweza kumleta Mungu katika mazungumzo, si tu wachungaji au viongozi wa kanisa au wainjilisti. Kisha, ikiwa watu wana nia ya kujifunza zaidi, tunaweza kushirikisha injili.

- Ni matatizo gani ya kila siku ambayo watu huzungumzia katika jumuiya yako? (Kwa mfano: Je, watu wanahisi mzigo mkubwa wa kutoa sadaka kwa roho? Je, watu huzungumza kuhusu matatizo na watoto wao, au ndoa zao?)

Maelekezo kwa Mwalimu: Subiri hadi mada kadhaa ziletwe. Kisha uliza:

- Unawezaje kumwongelea Mungu wakati unazungumza kuhusu mambo haya?

SHUGHULI YA KIKUNDI KIDOGO

Wakiwa wawili wawili, tayarisha igizo fupi. Onyesha mtu akimwongelea Mungu anapozungumza kuhusu moja ya mada tuliyojadili.

TOA MREJESHO NA MUHTASARI

Waombe watu wajitokeze kufanya igizo lao kwa ajili ya kundi zima. Acha kikundi kitoe maoni na mawazo.

Unapozungumzia maisha ya kawaida, mwongeele Mungu. Uliza ikiwa watu wangependa kujifunza zaidi. Ikiwa ndivyo, unaweza kushirikisha injili.

Unavutiwa, au La?

KIKUNDI KIKUBWA CHA MAJADILIANO

Mungu anaweza kutoa fursa za kushirikisha injili kupitia Matendo ya Upendo. Anaweza kutoa fursa kupitia mazungumzo ya kila siku. Lakini kutakuwa na wakati ambapo watu hawaonekani kuwa na hamu ya kusikia zaidi. Hebu tuzungumze juu ya nini cha kufanya katika hali hiyo.

Soma Matendo 17:32-34 tena.

- Paulo alifanya nini baada ya kujaribu kuwafanya watu wapendezwe kusikia juu ya Mungu? (*aliondoka*)
- Je, aliendelea kujaribu kuwashawishi watu ambao *hawakuvutiwa?* (*Hapana*)
- Je, alizungumza zaidi na watu ambao *walikuvutiwa?* (*ndiyo*)

Ikiwa watu hawana nia ya kusikia zaidi, hatuhitaji kuwalazimisha. Badala yake, tunaweza:

Kuendelea kuomba.

Kuendelea kufanya Matendo ya Upendo na kumwongelea Mungu katika mazungumzo.

Kuwa tayari kumshirikisha mtu yeyote mwenye nia.

Ikiwa watu wana nia ya kusikia zaidi, tunaweza kushirikisha injili. Katika somo letu linalofuata tutazungumzia jambo la kusema.

Hitimisho

Mungu wakati mwingine hutumia Matendo ya Upendo kutoa fursa za kushirikisha injili. Anaweza kutumia mazungumzo ya kila siku kutoa fursa hizo. Tunataka kuwaonyesha watu upendo wa Mungu na kumwongelea Mungu katika mazungumzo.

Watu wakiitikia na kuonyesha kupendezwa, basi tunaweza kuwauliza ikiwa tunaweza kuwaambia kuhusu Yesu. Ikiwa watu hawataki kusikia zaidi, tunaweza kusubiri. Tunaweza kuendelea kuomba, kumpenda na kumwongelea Mungu katika mazungumzo.

KIKUNDI KIDOGO CHA MAJADILIANO NA MAOMBI

Katika vikundi vya 2 au 3 fikiria mtu ambaye una uhusiano naye ambaye si Mkristo. Fikiria juu ya mada au swali unaloweza kuuliza ili kumsaidia mtu huyo kuanza kufikiria na kuzungumza kuhusu mambo ya kiroho. Mwombe Mungu akusaidie kuchukua hatua hii na afungue moyo wa mtu huyo.

Somo la 8: Kupanda Mbegu

Lengo Kuu

Picha nne zinaweza kutukumbusha kushirikisha juu ya Mungu, dhambi, sadaka ya Yesu, na maisha yetu mapya na tumaini la mbinguni.

Nyenzo

- Kadi ya Mchakato wa Uinjilisti: Kupanda mbegu
- Kadi Tatu za Mahusiano: (Kadi nne: Uumbaji, Anguko, Msalaba, Uzima wa Milele)

TAARIFA MAALUMU KWA MWALIMU: Somo hili linaelezea injili yote. Vikundi vingine vinaweza kuwa na uelewa na mawazo haya. Wanaweza kujifunza uwasilishaji huu wa injili haraka. Ikiwa mawazo kuhusu Mungu na dhambi si ya kawaida katika utamaduni wako, unapaswa kwenda polepole zaidi. Ruhusu muda wa maswali. Ni muhimu kuhakikisha wanafunzi wanaelewa kila sehemu ya hadithi ya injili. Huenda ukahitaji kuqawanya hili katika masomo mawili.

Utangulizi

KIKUNDI KIKUBWA CHA MAJADILIANO

Petro alilima shamba lake kwa makini. Aliondoa mawe na magugu yote na kufanya kazi katika mbolea nzuri. Alisubiria kwa wiki lakini hakuna kitu kilichoota katika shamba lake.

Maelekezo kwa Mwalimu: Shikilia *Kadi za Mchakato wa Uinjilisti: Kupanda mbegu*

- Petro alisahau kufanya nini? (*kupanda mbegu*)

Usipopanda, huwezi kupata mavuno. Kuwa Mkristo ni kama hivyo. Mtu hawezi kuanza uhusiano na Mungu na kuwa mfuasi kama hawatasikia injili.

Katika somo letu lililopita, tulijifunza kwamba Mungu atatupa fursa za kushirikisha injili. Haya yanaweza kuja kupitia Matendo ya Upendo au katika mazungumzo ya kila siku. Tunaweza kushirikisha injili watu wanapoonekana kutaka kusikia zaidi kuhusu Mungu.

KIKUNDI KIDOGO CHA MAJADILIANO

- Je, umewahi kujaribu kushirikisha injili?
- Ikiwa NDIYO – shirikisha uzoefu wowote uwe mzuri au mbaya.
- Ikiwa HAPANA – Kwa nini sivyo? Kipi kinapelekea iwe vigumu kushirikishai injili?

TOA MREJESHO

KIKUNDI KIKUBWA CHA MAJADILIANO


Wakati mwingine tunataka kushirikisha injili, lakini ni vigumu kujua kama tumeielezea vyema. Au hatuna hakika la kusema.

Maagizo kwa Mwalimu: Weka *kadi nne zinazoonyesha Mahusiano Matatu* ambapo darasa linaweza kuziona.

Somo la kwanza kabisa la TCT lilizungumzia mahusiano matatu ambayo Yesu alikuja kuyapatanisha. Picha hizi zitakumbusha kitu cha kushirikisha watu tunapopanda mbegu ya injili.

Uumbaji

Maelekezo kwa Mwalimu: Onyesha **VIONYESHI** Picha ya 1: Uumbaji. Hadithi hii inatoka Mwanzo 1-2. Unaweza kusoma hadithi iliyofupishwa hapa chini au kutumia akaunti ya kibiblia.




Watu wanahitaji kumjua Mungu ni nani. Anza kwa kusimulia hadithi ya Uumbaji. Zungumza kuhusu hadithi, na ina maana gani kwetu.

HADITHI: Mungu aliumba ulimwengu na vyote vilivyomo. Kila Alichokiumba kilikuwa kamilifu. Mungu aliumba bustani nzuri ili wanadamu wa kwanza, Adamu na Hawa, waishi humo. Hapo mwanzo, Mungu na Adamu walitembea na kuzungumza katika bustani hiyo. Adamu na Hawa waliishi kwa upatano. Ulimwengu alioumba Mungu ulitoa kila kitu ambacho Adamu na Hawa walihitaji.

INATUFUNDISHA: Mungu si kama roho zingine. Ana nguvu zaidi na anatawala juu ya kila kitu. Kila kitu duniani ni mali ya Mungu kwa sababu yeye ndiye aliyekiumba. Mungu ni mwema. Yeye kamwe hafanyi chochote kibaya. Mungu alikusudia wanadamu wawe na uhusiano mzuri pamoja Naye, wao kwa wao, na ulimwengu.

Anguko

Maelekezo kwa Mwalimu: Onyesha **VIONYESHI** Picha 2: Anguko. Hadithi hii inatoka katika Mwanzo 3, Mwanzo 12, na Kutoka.



Watu wanahitaji kujua dhambi ni nini. Simulia hadithi ya Anguko. Zungumza kuhusu hadithi, na ina maana gani kwetu.

HADITHI: Mungu aliwaambia Adamu na Hawa wasile tunda fulani katika bustani. Adamu na Hawa hawakumtii Mungu. Kutomtii Mungu, kufanya mambo mabaya, kunaitwa dhambi. Hii iliruhusu uovu kuingia ulimwenguni. Mungu alipoingia bustanini, Adamu alijificha kutoka kwa Mungu. Adamu na Hawa sasa walikuwa na mabishano kati yao. Kuanzia wakati huo, watu walianza kupigana. Ardhi ikawa ngumu kulima. Watu walilazimika kufanya kazi kwa bidii ili kuishi. Matokeo ya dhambi ni kuvunjika kwa mahusiano na hatimaye, adhabu ya kifo.


Mungu anatamani kurejesha kile kilichovunjwa na dhambi. Mungu alitoa sheria zake zinazoonyesha nia yake njema kwa kila eneo la maisha. Lakini hakuna mtu angeweza kutii sheria kikamilifu. Walitoa sadaka ili kulipia dhambi zao, lakini haikutosha kamwe.

INATUFUNDISHA: Watu wote, hata ikiwa hatumjui Mungu, wanajua kwamba mambo fulani tunayofanya si sahihi. Sisi sote tunatenda dhambi. Dhambi husababisha uhusiano wetu na Mungu, sisi kwa sisi na viumbe kuvunjika. Wakati mwingine tunajaribu kuweka sawa mambo mabaya tunayofanya na matendo mazuri au taratibu za kidini. Wakati fulani tunajisikia kukata tamaa, kwa sababu hatuwezi kamwe kuwa watu tunaajua tunapaswa kuwa. Sote tunastahili adhabu ya kifo.

Msalaba

Maelekezo kwa mwalimu: Onyesha **VIONYESHI** Picha ya 3: Msalaba. Hadithi hii inatoka katika Injili: Mathayo, Marko, Luka na Yohana.

Watu wanahitaji kumjua Yesu ni nani na alitenda nini kwa ajili yetu. Simulia hadithi ya Msalaba: Zungumza kuhusu hadithi, na ina maana gani kwetu.




HADITHI: Mungu alikuwa na mpango wa kupatanisha mahusiano yaliyovunjwa na dhambi. Ipatayo miaka 2,000 iliyopita, Mungu alimtuma Mwanawe Yesu duniani. Yesu alizaliwa mwanadamu. Yeye aliishi maisha yasiyo na dhambi. Alijiruhusu kuuawa kama sadaka kamilifu kwa ajili ya dhambi. Alikufa msalabani, akichukua dhambi zetu juu yake. Baada ya siku tatu, alifufuka, akishinda mauti. Bado yuko hai hadi leo.

INATUFUNDISHA: Yesu anaweza kusamehe dhambi zetu. Anaweza kuponya uhusiano wetu na Mungu, wengine, na uumbaji. Ili kuokolewa, tunamwamini Yesu. Tunamwomba atusamehe dhambi zetu. Tunajitolea kila sehemu ya maisha yetu kufanya mapenzi yake. Hii ndiyo maana ya kuwa Mkristo.

Uzima wa Milele

Maelekezo kwa Mwalimu: Onyesha **VIONYESHI** Picha ya 4: Kurudi. Yohana 3:16 na Ufunuo 21:1-7 ni mistari muhimu katika sehemu hii. Ikiwa kuna wakati, kariri Yohana 3:16 pamoja.



Shirikisha juu ya Uzima wa Milele:

Biblia inasema kwamba Mungu aliupenda ulimwengu hata akamtoa Mwanawe wa pekee, ili kila mtu amwaminiye asife, bali awe na uzima wa milele. Yeyote anayemwamini Yesu ataishi milele, hata baada ya kifo. Maisha haya mapya yanaanza SASA, kama tunavyojifunza kumtii Mungu. Mahusiano yetu yataanza kurejeshwa kwa jinsi Mungu alivyokusudia yawe hapo mwanzo. Siku moja, Yesu atarudi na kurejesha kabisa kila kitu. *'Hakutakuwa na kifo tena, wala maombolezo, wala kilio, wala maumivu.* Mahusiano yote matatu yataponywa milele.

Jizoeze Kushirikisha Injili

Maelekezo kwa Mwalimu: Shikilia kila moja ya **kadi** unapofupisha.

Hii ndiyo injili tunayotaka kushirikisha

Picha ya 1: Uumbaji: Mungu aliumba ulimwengu mkamilifu.

Picha ya 2: Anguko: Dhambi iliingia katika ulimwengu huo. Ilivunja uhusiano wetu na Mungu, kila mmoja wetu, na asili.

Picha ya 3: Msalaba: Mungu alitupenda sana hata akamtuma Mwanawe Yesu. Yesu alikufa ili kurejesha mahusiano yaliyovunjika katika anguko. Tunaweza kumwomba Yesu achukue dhambi zetu ili mahusiano yetu yaanze kupona.

Picha ya 4: Uzima wa Milele: Tunaweza kuishi milele na mahusiano yaliyorejeshwa. Maisha yetu mapya yanaanza SASA.

Kumshirikisha injili mtu hakuhitaji kufanywa mara moja. Huenda kukawa na mazungumzo mengi tofauti kwa muda. Unaposhirikisha, ni wazo nzuri kuuliza, 'Je, una maswali yoyote?'. Hii inawapa watu nafasi ya kufikiria juu ya kile ambacho wamesikia hivi punde. Wakiuliza swali ambalo hujui jinsi ya kujibu, unaweza kuwaalika kuzungumza na mchungaji wako.

Tena, USIJALI kuwa na maneno sahihi. Usijali kwamba utaacha kitu nje. Kazi yetu ni kufanya tuwezavyo, na kumwamini Mungu kufanya kazi katika mioyo ya watu.

SHUGHULI YA PAMOJA NA MWENZAKO

Maelekezo kwa Mwalimu: Gawanya katika jozi. Kila mtu anapaswa kuchukua zamu kushirikisha injili na mwenzake. Wanapaswa kufikiria juu ya picha nne. Baada ya dakika 15, badilisha jozi mpya na ufanye tena. Baada ya dakika 15, badilisha mara mmoja zaidi. Kwa jumla, shughuli hii itachukua kama dakika 45. Kila mtu atakuwa na nafasi 3 za kueleza ujumbe wa injili na nafasi 3 za kuusikia ukielezwa.

TOA MREJESHO NA MUHTASARI

- Je, ilikuwa rahisi kushirikisha injili mara ya kwanza au ya tatu?
- Bado una maswali au matatizo gani?

Maelekezo kwa Mwalimu: Ikiwa yeyote ana swali au tatizo, acha kikundi kijaribu kumsaidia. Hii itawaruhusu wajizoeze kujibu maswali kuhusu injili. Pia itakuonyesha ikiwa kuna maeneo ambayo kundi zima limechanganyikiwa.

Hitimisho

Wiki hii una kazi!

- Jizoeze kushirikisha injili angalau kwa mtu mmoja. (Anaweza kuwa mwamini mwingine.)

Mwombe Mungu akupe fursa za kushirikisha injili na mtu ambaye bado hamjui.

Somo la 9: Kusubiria Machipukizi Mapya

Lengo Kuu

Mungu yuko kazini. Hatupaswi kuwa na wasiwasi tunaposubiria watu waitikie injili. Hatuhitaji kujadiliana kuhusu gharama ya kweli ya kumfuata Yesu.

Nyenzo

- Kadi ya Mchakato wa Uinjilisti: Kupanda mbegu na Kusubiria machipukizi
- Kadi Tatu za Mahusiano: (Kadi nne: Uumbaji, Anguko, Msalaba, Uzima wa Milele)

Utangulizi

KIKUNDI KIKUBWA CHA MAJADILIANO

Maelekezo kwa Mwalimu: Shikilia Kadi ya Mchakato wa Uinjilisti: Kupanda Mbegu

Katika somo lililopita, tulizungumza juu ya kupanda mbegu. Tulitumia picha Tatu za Mahusiano kutusaidia kukumbuka kile cha kushirikisha. Tulifanya mazoezi ya kushirikisha injili.

MARUDIO

Maelekezo kwa Mwalimu: Inua juu Kadi tatu za Mahusiano ukiuliza haya maswali. Majibu hayahitaji kuwa hasa yale yaliyoorodheshwa; wakumbushe kikundi kwamba hawahitaji kuwa na maneno sahihi ya kushirikisha.

Picha ya 1: Uumbaji

- Ni jambo gani la kwanza tunaloshirikisha?
 - Mungu aliumba ulimwengu mkamilifu.
 - Mungu si kama roho zingine. Yeye ni mwenye nguvu na mwema.

Picha 2: Anguko

- Ni jambo gani linalofuata tunaloshirikisha?
 - Dhambi iliingia katika ulimwengu huo na kuvunja uhusiano wetu na Mungu, sisi kwa sisi na viumbe.

Picha ya 3: Msalaba

- Je, tunashirikisha nini kuhusu Msalaba?
 - Yesu ni Mwana wa Mungu.
 - Hakutenda dhambi kamwe.
 - Alikufa msalabani kama sadaka kwa ajili ya dhambi zetu.
 - Tunapompa Yesu maisha yetu, Yeye hutusamehe dhambi zetu na kuanza kuponya mahusiano yetu.

Picha ya 4: Uzima wa Milele

- Ni jambo gani la mwisho tunaloshirikisha?
 - Tunaweza kuishi milele na mahusiano yaliyorejeshwa.
 - Maisha yetu mapya yanaanza sasa.

Maelekezo kwa Mwalimu: Shikilia Kadi ya Mchakato wa Uinjilisti: Kusubiria Machipukizi.

Somo hili linahusu kusubiria machipukizi.

- Baada ya kupanda mbegu, unaweza kuona kinachotokea chini ya udongo? (Hapana)
- Je, unaweza kulazimisha mbegu kukua? (Hapana)

- Je, mkulima anaweza kufanya nini anaposubiria mbegu kuchipua? (*Kusubiri. Kuamini. Kutumaini. Kuombea mavuno mazuri.*)

Uinjilisti uko hivi. Baada ya kushirikisha injili, watu wanaweza kuhitaji muda. Hatupaswi kukubaliana au kuuza chochote. Tunamwamini Mungu kuwaleta watu katika ufalme wake.

Changamoto ya Toba

KIKUNDI KIKUBWA CHA MAJADILIANO

Tyeye Young Cambodia

Wakati fulani kulikuwa na mmisionari huko Kambodia. Alikuwa akishirikisha habari za Yesu na kijana mmoja. Mtu huyo alihuzunika alipotambua kwamba yeye ni mwenye dhambi na angeenda motoni kama adhabu kwa ajili ya dhambi zake. Hata hivyo, alipofikiria kuacha njia yake ya maisha ili kuwa Mkristo, hakuwa tayari kufanya hivyo. Kila wiki alikuja kwa mmisionari na kumwambia – nataka kuwa Mkristo. Mmisionari alijibu – je, uko tayari kuacha ndoto zako, tamaa zako, na kuishi kwa ajili ya Kristo pekee? Je, uko tayari kutotoa sadaka kwenye madhabahu ya familia bali kumwabudu Mungu? Je, uko tayari kutumia wakati kujifunza kumhusu Mungu? Kila wakati kijana huyo alienda akiwa na huzuni kwa sababu hakuwa tayari. Hata hivyo, aliogopa kulipia dhambi zake na kwenda kuzimu, hivyo alikuwa akirudi kila wiki na kumuuliza tena mmisionari – je, kuna njia nyingine ya kuwa Mkristo? Mmisionari alijibu – hapana, ama uwe mbali na maisha yako ya dhambi au usiwe Mkristo kabisa.

- Kwa nini kijana huyo alikuwa na huzuni? (*alitaka kuondolewa dhambi zake huku akiwa bado anazishikilia*)
- Kwa nini mmisionari asingeomba pamoja naye ili awe Mkristo? (*Hakuwa tayari kumfuata Yesu*)
- Je, unafikiri kwamba mmisionari huyo alikuwa sahihi kwa kutoomba naye ili awe Mkristo? Kwa nini, au kwa nini sivyo?

Hatimaye mwanamume huyo alikutana na mmisionari mwingine na kumwambia kwamba alitaka sana kuwa Mkristo. Mmisionari wa pili alikuwa na furaha – mtu huyo alitaka kuwa Mkristo. Mmisionari wa pili alimshirikisha kwamba alichohitaji kufanya ili kuwa Mkristo ni kusema sala ya toba. Kijana huyo alifurahi sana – kulikuwa na njia nyingine. Alichotakiwa kufanya ni kuomba tu. Ilikuwa rahisi sana, hakuweza kufikiria kwa nini mmisionari wa kwanza aliifanya iwe ngumu sana. Yeye akasali sala na alirudi katika maisha yake ya dhambi, akiwa na furaha kwamba hakuwa na wasiwasi kuhusu kwenda kuzimu. Hakuna hata mmoja wa wamisionari aliyewahi kumwona mtu huyo tena.

Hadithi tuliyomaliza kusoma inafanana sana na hadithi nyingine inayopatikana katika Biblia.

Soma Marko 10:17-22.

- Yule kijana tajiri alipofika mara ya kwanza, aliuliza nini? (*jinsi ya kupata uzima wa milele*)
- Yesu alimwambia kijana tajiri kufanya nini? (*kuuza kila alichonacho na uwape maskini*)
- Jibu la kijana huyo lilikuwa nini? Je, alifanya kile ambacho Yesu alisema? (*Anaenda zake akiwa na huzuni. Hakufanya hivyo*)
- Je, kijana tajiri aliokolewa? (*Hapana*)
- Kwa nini haikuwa hivyo? (*Hakuwa tayari kumtii Yesu.*)

Yesu alijua kwamba kijana huyo alipenda pesa zake kuliko Mungu. Mtu huyo hakuwa tayari kutoa mali yake kwa ajili ya Yesu. Yesu asingemruhusu kijana huyo kumfuata isipokuwa angemtii Yesu katika kila eneo la

maisha.

- Ikiwa mtu hayuko tayari kuacha dhambi na kumtii Yesu, je, kusema sala ya toba kutamfanya aokoke? *(Hapana)*
- Je, kijana wa Kambodia aliokolewa baada ya kusema sala ya toba? *(Hapana, hakubadilika)*

MUHTASARI

Hatupaswi kumlazimisha mtu kusema sala ya toba. Ni Mungu pekee anayeweza kumbadilisha mtu ili aweze kumfuata Yesu. Ni lazima tuwe waaminifu kuandaa udongo na kupanda mbegu za injili. Tunaweza kumwamini Mungu kwa kuleta mavuno kwa wakati wake.

Gharama na Thamani

Hebu tufikirie sababu nyingine ambazo huenda mtu hayuko tayari kumfuata Yesu.

TAFAKARI BINAFSI

Maelekezo ya Mwalimu: Soma maswali yafuatayo na toa dakika 2 kwa tafakari ya mtu binafsi.

- Je, unamfahamu mtu yeyote aliyesababisha matatizo katika familia yake, walipoamua kumfuata Yesu? Katika jamii yao?
- Je, ilikuwa rahisi au vigumu kwako kuamua kumfuata Kristo? Ulipaswa kuzingatia gharama gani? Ni mabadiliko gani ulipaswa kufanya katika maisha yako? Je, ilikuwa na thamani?

TOA MREJESHO

Maelekezo ya Mwalimu: Aliku watu washirikishe hadithi kuhusu gharama ya kumfuata Yesu.

KIKUNDI KIKUBWA CHA MAJADILIANO

Soma Luka 14:25-33

- Kulingana na kifungu hiki, gharama ya kuwa mfuasi ni nini?
 - Wachukie hata familia zao ikilinganishwa na jinsi wanavyompenda Yesu.
 - Beba msalaba - kuwa tayari kujitolea na kuteseka kwa ajili ya Yesu.
 - Kuwa tayari kuacha kila kitu tulicho nacho.
- Ni kitu gani ambacho wasioamini hawataki kubadilisha wala kuacha ili kumfuata Yesu? *(majibu yanayowezezekana ni kama: kibali cha familia, hadhi au heshima katika jamii, usalama, au kuabudu mizimu mingine)*

Soma Mathayo 13:44-46.

- Yesu analinganisha Ufalme wa Mbinguni na nini?
 - Hazina
 - Lulu
- Hazina hiyo ilikuwa na thamani ya kiasi gani?
 - Kila kitu walichokuwa nacho
- Je, wanaume hao walikuwa na huzuni kulipa gharama?
 - Hapana, walikuwa na furaha

Mtu akisema anataka kumfuata Yesu, ni lazima ajaribu kumtii Mungu katika kila eneo la maisha. Ni lazima wamchague Yesu badala ya kufurahisha familia na marafiki zao. Ikiwa watu hawafikirii kuhusu gharama hii, hawaelewi kwa hakika maana ya kumfuata Kristo. Lakini Yesu ni wa ajabu sana hivyo gharama yake inastahili!

SHUGHULI YA KIKUNDI KIDOGO

Maelekezo ya Mwalimu: *Chagua maswali mawili ambayo ni bora kwa muktadha wako. Toa swali la kwanza kwa nusu ya kikundi na swali la pili kwa nusu ya kikundi. Vikundi vinapojadili, vikumbushe kutokubaliana au kushawishi.*

- Fikiria umemshirikisha injili mtu fulani naye akasema, 'Nataka kuwa na uzima wa milele, lakini familia yangu haitaniruhusu kuwa Mkristo.' Unaweza kufanya au kusema nini?
- Fikiria umemshirikisha injili mtu fulani na kusema, 'Nataka kuwa Mkristo, lakini mapato yangu yanatokana na kutengeneza pombe. Siwezi kuacha kufanya hivyo.' Unaweza kufanya au kusema nini?
- Hebu fikiria umemshirikisha injili mtu fulani na kusema, 'Ninataka kumwabudu Yesu pamoja na miungu yetu mingine ya nyumbani.' Unaweza kufanya au kusema nini?

TOA MREJESHO

Mtu Akiikataa Injili

KIKUNDI KIKUBWA CHA MAJADILIANO

Fikiria tena hadithi ya yule kijana tajiri na Yesu.

- Je, kijana huyo alimkubali Yesu? (*Hapana*)
- Je, Yesu alifanya kazi mbaya katika kueneza injili kwa kijana huyo? (**kumbuka:** swali hili linaweza kuleta mkanganyiko mkubwa! Waruhusu walijadili kwa dakika chache ikihitajika. Uliza maswali kama, 'Wengine wanafikiri nini? Unakubali? Ni nini humfanya mwinjilisti aliyefanikiwa?')
- Tukishirikisha injili lakini watu bado hawajawa Wakristo, je, tumeshindwa? (*Hapana*)

Yesu hakuwahi kutenda dhambi wala kushindwa. Siku zote alifanya mapenzi ya Mungu kwa ukamilifu. Lakini baada ya Yesu kuzungumza na kijana huyo, hakuokolewa. Kama wainjilisti, tunaweza kuwa na wasiwasi kwamba ikiwa mtu huyo hataokolewa, tulifanya vibaya. Lakini Mungu anapendezwa nasi tunapomtii. Tunaweza kumwamini kwa matokeo.

Tunaweza kufanya kitu gani kingine?

Jambo bora tunaloweza kufanya ni kuendelea kuwaomba waokolewe. Mungu pekee ndiye anayeweza kuwapa watu maisha mapya. Ni lazima tuendeleo kuonyesha upendo kwa mtu huyo. Tunaweza pia kusali, 'Mungu, nisaide kujua jambo la kufanya baadaye.' Mungu anaweza kutuonyesha mambo ya kufanya, kwa mfano:

- Shirikisha ushuhuda wako.
- Shirikisha mistari zaidi ya Biblia na hadithi za Biblia.
- Mlete mchungaji awatembelee.
- Waalike kanisani au kujifunza Biblia.

Chochote kitakachotokea, hatuhitaji kujadiliana au kuwashawishi. Yesu hakufanya hivyo na yule kijana tajiri. Alimruhusu mtu huyo kuchagua kuondoka, ingawa ilikuwa ya huzuni.

Hitimisho

Tunaposhirikisha injili, tunaweza kutaka kujaribu kufanya gharama ya kumfuata Yesu ione kane kuwa nafuu.

Hatuhitaji kufanya hivyo. Mungu atawasaidia watu kuelewa jinsi Yeye alivyo wa ajabu na wa thamani. Lazima tuonyeshe upendo kwa uaminifu na kushirikisha injili. Tunaweza kumwamini Mungu kufanya kazi katika mioyo ya watu.

Somo la 10: Kutoka Chipukizi hadi Matunda

Lengo Kuu

Watu wanapokuwa tayari, tunaweza kuwaalika wamfuate Yesu. Ni lazima tufanye wanafunzi Wakristo wapya.

Nyenzo

- Kadi za Mchakato wa Uinjilisti (kadi 6)

Utangulizi: Chipukizi Jipya

KIKUNDI KIKUBWA CHA MAJADILIANO

- Uliulizwa maswali gani ulipobatizwa?

Maelekezo kwa Mwalimu: Shikilia Kadi za Mchakato wa Uinjilisti: Chipukizi jipya

Mtu anapotaka kuwa Mkristo, muulize maswali haya.

- Je, unaamini kwamba Yesu pekee ndiye anayeweza kukuokoa kutoka kwenye dhambi yako?
- Je, uko tayari kuacha kutenda dhambi na kumtii Mungu katika kila eneo la maisha yako?

Maelekezo kwa Mwalimu: Liambie darasa lirudie maswali mawili mara kadhaa.

Ikiwa mtu anaweza kusema ndiyo kwa maswali haya, wako tayari kuwa Mkristo. Hapa kuna maombi rahisi ambayo unaweza kuomba pamoja nao. (Unaweza pia kuwaleta kwa mchungaji wako au kiongozi mwingine wa kanisa. Mtu huyo anaweza kuomba pamoja nao.)

Yesu, ninajuta dhambi zangu. Naamini wewe ni Mungu na wewe ni mwema. Tafadhali nisamehe dhambi zangu. Nifanye safi. Ninakupa maisha yangu, yote.

Chipukizi hadi Matunda

KIKUNDI KIKUBWA CHA MAJADILIANO

Maelekezo kwa Mwalimu: Shikilia Kadi za Mchakato wa Uinjilisti: Chipukizi jipya, na Matunda.

Mtu anapokuwa Mkristo, anakuwa kama chipukizi jipya. Leo tutazungumza jinsi ya kutoka hapa (shukilia 'Chipukizi mpya') hadi hapa (shikilia 'Matunda').

- Je, unakumbuka lengo la uinjilisti? (kuwaleta watu katika uhusiano na Mungu ili wawe wanafunzi)
- Tunajua mtu akiwa mfuasi? (wana matunda)
- Je, mimea mipya hutoa matunda papo hapo? (Hapana)
- Ni mambo gani ambayo wakulima watafanya wakati mimea yao inapoanza kukua? (majibu yanayowezekana ni pamoja na: kuondoa magugu, kulinda dhidi ya wanyama, kumwagilia, nk)

Maelekezo kwa Mwalimu: Shikilia Kadi za Mchakato wa Uinjilisti: Kuhudumia machipukizi mapya

Uinjilistishaji haukomi watu wanapokuwa Wakristo. Kama vile mkulima anavyotunza chipukizi jipya, lazima tuwasaidie waumini wapya kukua.

Kuhudumia Chipukizi: Uanafunzi

KIKUNDI KIDOGO CHA MAJADILIANO

Soma Agizo Kuu tena (Mathayo 28:19-20).

- Sehemu mbili za kufanya wanafunzi ni zipi? (*kuwabatiza na kuwafundisha kutii yote aliyoamuru Yesu*)
- Ulipoanza kuwa mwamini, hukuelewa mambo gani? Je, waumini waliokomaa zaidi walikufundisha mambo gani?
- Ni sehemu gani za maisha yako ya zamani yalikuwa magumu zaidi kubadilisha au kuacha?

TOA MREJESHO NA MUHTASARI

Waumini wapya hawatakuwa wakamilifu ghafla. Ni kawaida bado kupambana na dhambi. Mahusiano mengine bado yatakuwa magumu. Siku zote hawatatenda kwa njia zinazomletea Mungu heshima. Ni lazima tuwafundishe kumfuata Kristo katika kila eneo la maisha yao. Hii inaitwa uanafunzi, kwa sababu tunamsaidia mtu kukua kama mfuasi.

KIKUNDI KIKUBWA CHA MAJADILIANO

Tatizo la Yoshua

Yoshua alipokuwa Mkristo, alifurahi sana. Dhambi zake zilisamehewa! Lakini kadiri wiki zilivyopita, alianza kuvunjika moyo. Kwa miaka mingi ndoa yake ilikuwa ngumu. Yoshua alifikiri kwamba alipokuwa Mkristo, ndoa yake ingekuwa rahisi zaidi. Alifikiri hatamkasirikia mke wake tena. Yoshua aliogopa kuongea na watu wengine kanisani. Je, wangepikiri hakuwa Mkristo kweli?

- Kwa nini Yoshua alivunjika moyo?
- Tunawezaje kuwasaidia Wakristo wapya kushirikisha mapambano yao? Kipi kitakusaidia kujisikia huru kushirikisha?

Ni muhimu kuwasaidia waumini wapya kujua kwamba ni salama kushirikisha mapambano yao. Hawawezi kupokea msaada ikiwa hakuna anayejua wanahitaji. Tunaweza kushirikisha mapambano yetu wenyewe kutoka zamani. Tunaweza kushirikisha matatizo tunayoyakabili sasa. Mwamini mwingine anapopitia changamoto, tunaweza kuonyesha huruma na msamaha.

Njia za Msingi za Kufuata

KIKUNDI KIKUBWA CHA MAJADILIANO

Soma Waebrania 10:24-25

- Je, mstari huu unasema tufanye nini?
 - *Kuhimizana katika upendo na matendo mema*
 - *Msiache kukutana*
 - *Tiane moyo*

Mstari unasema tusikate tamaa kukutana pamoja. Usiwaache waumini wapya wajaribu kukua katika imani yao pekee. Kutana nao mara kwa mara, sio tu wakati wa kanisa! Wakati huu unaweza:

- KUWATIA moyo:

- Waombee na kuomba pamoja nao.
- Shirikisha kile Mungu amefanya na anachofanya katika maisha yako.
- Waalike wengine (marafiki, mchungaji wako) waje kushirikisha.
- Shirikisha hadithi ya Biblia au baadhi ya mistari.
- WAHAMASISHE katika upendo na matendo mema:
 - Waalike waende kujifunza Biblia nawe.
 - Waalike kushiriki nawe katika Matendo ya Upendo.

SHUGHULI YA PAMOJA NA MWENZAKO

Maelekezo kwa Mwalimu: Gawanya kikundi katika jozi. kipe kila kikundi changamoto kutoka kwenye orodha iliyo hapa chini. (Chagua hali zinazofaa kwa Wakristo wapya katika eneo lako.) Waambie watayarisha igizo fupi. Linapaswa kuonyesha mtu akimfundisha mwamini mpya kwa kutia moyo (maombi, kushirikisha) na kuhamasisha (kualika kujifunza Biblia au AOL). Acha kila jozi ifanye maigizo yao kwa kundi lingine. Waambie wengine wa kikundi watoe mrejesho na mawazo.

- Familia yao ina hasira kwa sababu walikuwa Wakristo.
- Familia yao inawataka waabudu kwenye madhabahu ya familia.
- Mtoto wao ni mgonjwa, na wanajiandaa kumpeleka kwa mganga.
- Wanajaribiwa kunywa pombe wanapopata msongo wa mawazo.
- Wana uhusiano mgumu na jirani.

MUHTASARI

Kufuasa kunamaanisha tunatembea maishani pamoja. Tunawaonyesha waumini wachanga jinsi ya kuomba, kusoma biblia, na kukua katika Kristo. Tunawahimiza kutokata tamaa!

TAFAKARI BINAFSI

Fikiria mtu fulani katika kanisa lako ambaye ni mwamini, lakini haonekani kukua kama mfuasi. Mwombee mtu huyo na umuulize Mungu unachoweza kufanya ili kumsaidia kukua.

Marudio ya Moduli ya Uinjilisti

KIKUNDI KIKUBWA CHA MAJADILIANO

Tumezungumza jinsi uinjilisti ni kama kilimo. Hili ni somo la mwisho katika moduli ya uinjilisti. Hebu turudie mambo makuu.

Maelekezo kwa Mwalimu: Ikiwa darasa lina shida na jibu, pitia mambo makuu ya somo pamoja nao na kisha uulize maswali tena.

Shikilia juu Kadi ya 'Kutayarisha udongo'

- Lengo la uinjilisti ni lipi?
 - kufanya wanafunzi/ kuwa na uhusiano na Mungu
- Mwinjilisti ni nani? Kila Mkristo
- Mungu anatumia nini kutayarisha udongo?
 - maisha yetu ya kila siku
 - Shuhuda zetu
 - maombi yetu

Shikilia juu Kadi ya 'Kupanda mbegu'

- Kipi kinachoweza kuleta fursa za kushirikisha injili?
 - Matendo ya Upendo
 - Mazungumzo ya kila siku
- Tunaposhirikisha injili, Mahusiano Matatu yanatukumbusha kushirikisha kuhusu nini?
 - Umbaji
 - Anuko
 - Msalaba
 - Uzima wa Milele

Shikilia juu Kadi ya 'Kusubiria chipukizi'

- Je, tunahitaji kukubaliana kuhusu gharama ya kumfuata Yesu? Hapana

Shikilia juu Kadi ya "Chipukizi jipya".

- Je, unaweza kukumbuka maswali mawili tunayoweza kuwauliza watu wanaotaka kuwa Wakristo?
 - Je, unaamini kwamba Yesu pekee ndiye anayeweza kukuokoa kutoka kwenye dhambi zako?
 - Je, uko tayari kuacha kutenda dhambi na kumtii Mungu katika kila eneo la maisha yako?

Shikilia juu Kadi ya 'Kuhudumia chipukizi'

- Mtu anapokuwa Mkristo, tunahitaji kuendelea kufanya nini?
 - Kuwafundisha wanafunzi / kuwasaidia kukua

Shikilia juu Kadi ya "Matunda".

- Tunajuaje mtu fulani ni mfuasi wa Yesu? Wana matunda

Mtu anapoonyesha matunda, tunajua kwamba yeye ni mfuasi, na ana uhusiano na Mungu. Hivi ndivyo uinjilisti unavyohusu.

Hitimisho

KIKUNDI KIKUBWA CHA MAJADILIANO

- Ni jambo gani la kushangaza zaidi ulilojifunza kwenye moduli hii?
- Ni jambo gani moja ambalo Mungu anaweza kutaka uanze kufanya?
- Una maswali gani mengine kuhusu uinjilisti? Kuna mada zingine ambazo ungependa kuzizungumzia?

Maelekezo kwa Mwalimu: Alika darasa kujibu maswali. Ikiwa kuna mada zingine za kuzungumza, ziandike ili timu ya uongozi wa TCT ipate maoni.

Waombee washiriki wanapotumia masomo haya.